

宋

會

要

宋會要

起復

宋朝之制文臣諫舍以上牧伯刺史以上丁父母憂者皆卒哭後恩制起復牧伯以上仍加將軍階內職遭喪者但給假而已其願終喪制者亦聽惟京朝幕職州縣官皆解官行服亦有特追出者慶曆初始詔三司副使已上非領遣寄聽解官終制然經卒哭亦降制起復須上表乞終喪乃詔可嘉祐初復許開門祇候使臣內殿崇班大子率府率正刺史以上解官行服惟軍職遣任給假百日追出供奉官以下願行服亦聽宗室初同此制熙寧初自副率以上並解官行服焉 太宗太平興國六年二月二十五日詔曰三載通喪百王達禮近朝

以降急於用人凡鍾艱疾之臣多行抑奪之命而起復
臣僚等或速於陳力或志切感恩未滿十旬便赴朝謝
念忠勤之節誠則可嘉於敦勸之風竊恐未盡自今並
許百日後來赴朝謝其料錢即自敕下日支給 雍熙
二年十一月二十一日詔曰三年之制謂之通喪聖人
垂教百代不易向者臣僚居喪多從抑奪蓋切於為理
而急于用人求便一時誠非永制方敦孝治以厚時風
宜從樂棘之心俾守苴麻之禮自今京官幕職州縣官
有丁父母憂者並放離任京官見奉使差委者候替離
任常叅官奏取進止先是應御前及第并江浙人任在
北州縣官丁憂者並不令離任職事官及見任川廣江

浙河東幕州縣官丁憂者亦不聽離任自是遂解官然
朝官間亦有特追出者 端拱二年八月二十六日詔
京朝官丁憂多是轉運使或本州舉留比至替迴已終
喪紀自應在外充知州軍監并通判官者如有以次官
處便放離任待服監臨物務有同監者准此如只一員
者疾速奏聞差人充替幟或舉占並科違制之罪其幕
職州縣官丁憂者竝所在放離任負闕違具奏聞注填
至道一年十月二十八日太常博士直史館梁顥太
常丞直集賢院趙安仁各丁憂特勅追復本職自是轉
運直館多特恩追出者真宗景德元年十月二十四日
有司言左司諫知制誥晁迥起復本官准故事合綴本

班之末特詔叙班仍舊 三年四月二十八日詔川峽
官丁父母憂者除州軍長史奏取旨餘許解官行服
大中祥符六年六月十七日故莊宅副使劉仁霸子大
理評事中象免持服僉事澧州判官事仁霸知澧州綏
撫蠻人有政績至是卒荆湖轉運使陳世卿言中象父
隨父在任頗諳溪洞事故以命之 七年八月十六日
三司言戶部判官虞部員外郎素成務丁父憂望持免
持服宰臣言淳化中寇準為三司推官嘗有此例特詔
從之 九年正月十九日樞密使王欽若言編修冊府
元龜官太常博士秘閣校理聶震丁所生母憂嫡母尚
在望特免持服詔禮儀院參詳以聞禮儀院言按周制

庶子在父之室則為其母不禫晉解遂問蔡謨曰庶子
喪所生嫡母尚存不知制服輕重荅云士之妻子服其
母與凡人喪母同鍾陵胡澹所生母喪自嫡兄承統而
嫡母存疑不得三年況親所生乎嫡母雖尊然厭降之
制父所不及婦人無專制之事豈得引父為比而屈降
之子南齊褚淵遭庶母郭氏喪塋畢起為中軍將軍後
嫡母吳郡公主薨葬畢令攝職若此則震當解官行服
心喪三年若特有奪情之命望不以追出為名自今顯
官有類此者亦請不稱起復詔震依舊赴宣徽院編修
時議謂震難於抑奪故止遣釐職蓋從官之制也
五
月四日殿中侍御史張廓言京朝官丁父喪者多因陳

乞與免持服且忠孝思義士大夫所守苟失節悖禮何
能立身今執事盈庭無金革之事中外之官不可習以
為例伏望自今竝依典禮令解官行服詔從之其官秩
當起復及武臣內職悉如舊制 七月二十三日引進
使英州團練使知秦州曹瑋以母亡奏聞中書言秦州
遠要慮有闕事準咸平二年王超丁憂翌日降制起復
今請速追瑋出即日授起復雲麾將軍 天禧三年十
月三日工部侍郎知禮儀院楊億丁母憂宰臣言冬至
郊祀億典司禮樂之任望不俟卒哭起復從之五年二
月二十一日知雜御史劉焯言伏以三年之喪天下經
制百行之本孝子大倫苟執禮以無聞在履行而有缺

伏見內外京朝官丁父母憂者不即時奔喪持服傷壞風教紊缺典章欲望自今官司不曰妄有占留奏求追出其例當起復者則依舊制詔益梓夔利四路長史依舊奏取旨餘官丁憂輒有封奏求免持服者並論其罪

八月十一日樞密直學士給事中知并州馬元方丁母憂詔即日起復仍給假半月往潞州奔喪以元方任邊郡故不俟卒哭而奪情焉 仁宗天聖元年二月十二日詔秘書少監王隨去年八月丁母憂可依制起復差知潤州先是隨請宜丁憂因中書奏陳故有是命

六年六月二十六日編勅官國子博士董希顏丁父憂歸鄉編勅司奏希顏精習法令編錄有緒望特追出從

之 八年正月十一日三司言內殿崇班勾當南作坊張繼恩右班殿直監稅場李中孚並父母亡準式請假據檢法官定到天禧元年勅於準式假內量給日限即令赴職竊詳上件勅文蓋是基以下喪即未見為父母喪不解官之文望付禮官詳定太常禮院言按令之諸喪斬哀三年齊衰三年者並解官齊衰杖朞及為人後者為其父母如庶子為後為其母亦解官申其心喪母出及嫁為父後者雖不服亦由心喪皆為生已者其繼並心養母如改嫁或歸宗經三年以上繼絕及父為長子夫為妻並不解官假同齊衰期又詳後唐應順元年勅內諸司使副帶西班正官者及供奉官殿直承旨

等宜過卒哭後舉追赴職帶東班官者只以檢校官充
職服闋日授前官諸司使副至二班使臣遭父母喪蓋
是例不解官即無給假日限今詳父母之喪至重欲請
自今並依舊制過卒哭後許赴朝參供職從之 慶曆
元年十月十九日詔三司副使自今丁父母憂竝如兩
制例起復初三司副使張錫丁母憂而三司使姚仲孫
為請特起之故以為例 五年八月九日前龍圖閣直
學士起居舍人田況起復為秦鳳路馬步軍都總管經
略安撫使兼知秦州仍遣內侍賜手詔以敦諭之況固
請終父喪從之 七年十月三日詔令田況名見況言
禔制未滿欲依起復例服歸又緣不帶起復官詔服素

紗巾黑帶入見 英宗治平二年二月二十九日以前

禮部侍郎樞密副使吳奎起復故官職召奎于大理評

事環見於延和殿面諭詔賜奎令起復奎固辭從之

神宗熙寧三年十一月十九日詔今後丁憂服闋除見

在任兩府中書檢舉施行外大兩省待制以上武臣正

刺史以上御史臺中書門下省閣門檢舉聞奏或降詔

書或降劄子外小兩省及文武京朝京丁憂服闋令中

書門下省御史臺閣門檢舉牒報本人赴御史臺閣門

參見訖關所司依自来朝參朝見體例施行更不別給

授前官告敕其未出官之人仍不用參見之例 四年

正月二十六日持服前推忠協謀佐理功臣光祿大夫

行禮部尚書同中書門下平章事集賢殿大學士陳升之可特起復升之請終喪許之 二月十七日中書門下言臣僚有丁憂合解官之人或因朝廷任使不許持服每降指揮並云與免持服仍入銜位看詳朝廷辭令不可不正人臣之在憂恤以君命奪情使之從政豈非其所欲不當謂之免也欲今後臣僚有喪如因事任不令解官即降指揮不許持服仍不須入銜從之 九年九月二十五日知桂州石鑑言前邕州蘇緘久任邕州威惠得所既沒於賊人頗思之男將作監丞子元通曉邊事雖見持服欲乞持起復差通判邕州詔于元改殿中丞起復權發遣邕州通判仍賜緋 元豐元年五月

七日起復樞密直學士起復舍人僉書樞密院事曾孝
寬乞終喪許之給半俸又辭從之 哲宗元祐元年閏

二月十八日隨州觀察史駙馬都尉景臻皇叔祖建雄

軍節度觀察留後同知大宗正事宗景並起復 三年

二月一日起復建雄軍節度觀察留後同知大宗正事

宗景落起復 十一月二日詔皇伯祖前彰化軍節度

涇州管內觀察處置等使檢校司空開府儀同三司持

節涇州諸軍事涇州刺史判大宗正事上柱國高家郡

王食邑七千八百戶食實封二千四百戶宗晟可特起

復如故 四年五月六日前鎮安軍節度觀察留後檢

校司空駙馬都尉王師約起復 七月二十二日詔知

樞密院事安燾母亡候卒哭起復燾力辭許之 十二

月二十八日詔通州防禦使駙馬都尉郭獻卿起復

六年八月十九日前榮州防禦使駙馬都尉曹詩起復

如復故 閏八月二十三日前隨州管內觀察使檢校司

空駙馬都尉錢景臻特起復如故 紹聖元年八月十

四日詔范純粹已差知延安府不得輒有辭免候大祥

畢更不候禫除速赴本任 元符元年八月二十一日

詔文武臣僚除管軍及邊任取旨起復外餘並罷初三

省言駙馬都尉郭獻卿卒哭當起復上曰非從事金革

而起復者雖有故事非古也其餘之乃降是詔 徽宗

崇寧二年十月十八日起復鄭僅依前朝請即直龍圖

閩陝西路轉運副使 大觀三年正月二十一日制曰
斷恩之義蓋堅許國之誠以皇叔持服前定國軍節度
同州管内觀察處置等使持節同州諸軍事同州刺史
食邑六千四百戶食實封一千五百戶普安郡王慤可
特起復依前官知西外宗正事管勾宗正學士勲食邑
食實封如故 四年九月十一日詔殿中省尚藥典御
馮珣見丁父憂為將來冬祀大禮闕人祇應可特起復
依舊供職 政和三年七月十一日起復王憲依前安
靜軍節度使提舉西京嵩山崇福宮 四年六月二十
二日起復徽猷閣侍制宋昇為京西路都轉運使 五
年二月十四日中書省言檢會今月十二日奉御筆發

運使李偃起復仍舊不許辭避候指揮到當日赴任如
注滯論如違御筆 六年十月四日詔前翰林學士承
旨朝請郎知制誥王黼起復除宣和殿學士提舉寶籙
宮 七年三月二十二日起復宣和殿學士提舉寶籙
宮兼侍講修國史王黼奏乞終喪詔不允毋復重陳四
月二十三日御筆持心喪人朝散大夫將作少監趙士
誦可起復除少府少監 五月七日詔持心喪前從事
郎宋喚特與起復添差京畿運司 九月二十二日臣
僚言竊見起復中大夫直秘閣知溫州徐韶美昨以家
憂奪情從政近降詔以韶美不治郡事普然無狀則其
闕茸非才固已不逃於聖鑒然罷郡職而猶曰依前起

復監西獄廟夫起復所以待非常之材闕葺非起復之人獄廟非起復之任且今韶美歸路喪制候服闋日依今來詔命庶協師言詔徐韶美依舊持服候闋日依已降指揮 十月二十五日聖旨中大夫王仲薏起復知越州十一月七日持服前少保太宰蕪門下侍郎鄭居中可持起復如故八年九月乞終制詔從之 八年二月二十六日詔丁憂人前朝請大夫權提點淮南東路刑獄劉燾可特起復差遣依舊 六月二十三日御筆持服人王敏文特起復除利州路轉運判官 七月二十九日詔丁憂人前翰林學士朝奉郎知制誥馮熙載起復依舊供職 九月十一日起復延康殿學士光祿

親

百

大夫河東經略安撫使姚祐臣僚言其奪民墓地詔與
宮觀 宣和元年二月十五日詔持服前中大夫徽猷
閣待制淮南江浙等路發運使詹度特起復差遣如故
四月三日詔丁憂人前朝散郎充顯謨閣待制劉阜
民可持授起復提舉上清寶籙宮 十一日臣僚上言
臣子之大節二忠孝而已在家則致孝于親在朝則致
忠於君君親一也不敢有擇焉故三年之喪雖天下之
通喪間起復以從王事則欲辭而不可亦分所當然聖
王雖以義掩恩而奪其罔極之報亦未嘗不以起用情
而權其輕重之宜故近歲唯責任之專聲隨然其身不
可一日去朝廷之上則不得已而起之然猶親 震翰

錫諭丁寧至于再四陛下所以厚臣鄰者委曲盡矣自去年已來浮淺薄惡之人不體朝廷之意乃欲倣傚以此為俗偶持權利者又輒為人陳乞而欲示恩親舊深可嘆駭謹取其甚者一二言之栲栳之後都壕寨張燮乞起博州司錄康翼為部役官部役之材如翼者不乏也事係祖宗陵寢故從之今功成行賞矣翼自合居廬終制乃聞治裝將起博州新任昨來聖旨起三陵部役官耳非起博州司錄也於翼安乎近措置東南錢事朱尹乞起地功郎陸元佐為幹當官尹當辟者繞三人諒不難得必欲起元佐何耶此乃人主為國不得而為之者也今人臣乃以此市恩顯言而不忌大非臣所諭也

不惟如此少府供奉尚方最為繁重近起趙士珉為少
監士珉凡甚正史身不居憂猶當論列今至奪情以任
此何示天下乏才之甚耶又有甚者起復本以從王事
也才不才姑置未論今乃有起而任宮廟者修職即賞
雋是也有起而待闕者拱州通判趙士源是也既不執
喪則非所以為孝又不任事則非所以為忠視俸祿幾
何而廢君親之大義進退皆無所據其傷風教甚矣此
五人者或留或去何繫朝廷之重輕然不抑而正之恐
浸相倣倣不止於此伏望睿斷先勒令持服仍詔三省
應大臣起復者並具名進入斷自睿裏察其方倚以事
功決不可去者勉令在職其餘並遣終喪使天下曉然

知朝廷起復皆緣國事非以為恩而明倫厚俗之教未
嘗不謹於天下淺夫鄙人洗心易慮率改薄而從忠臣
下不勝幸甚詔康翼等五人除宗室外前降免持服等
指揮更不施行餘依奏令中書省具名進入 二年四
月十二日詔知太宗正事仲渙可持與起復朝見先次
日下供職 四月十七日起復范致虛為資政殿學士
知鄆州二十七日起復王鼎為尚書吏部侍郎 五月
二日制持服人劉敷起復檢校少保依前響德軍節度
使充中太一宮使進封開國公加食邑五百戶食實封
二百戶同日制持服人劉敏起復可特授岳陽軍節度
使管勾皇城司進封彭城縣開國子食邑五百戶食實

封三百戶 六月十一日詔持服人前檢校大傅河東

節度使中太一宮使直保和殿明堂提舉兼在京神霄
王清萬壽宮副使安定郡開國公食邑三千八百戶食
實封一千三百戶梁師成可持起復依前官職食邑實
封如故 七月十四日詔文臣如故事非因邊防勿起
復 二十三日資政殿學士太中大夫新知東平府范
政虛奏伏覲七月十四日奉聖旨今後文臣起復除因
邊防依故事外餘更不起復臣近蒙聖慈起復授臣前
件職任三具表劄辭避一奉詔書兩次御翰不許辭免
勿更有請臣惶恐上道扶病造朝今已起發赴官 今
月十九日伏覲前項聖旨指揮雖有今後之文緣臣依

上件指揮終是不該起復之人在臣私義不得不自陳
列伏念臣行年幾六十又素羸連年喪禍憂患叢心臣
衷志謝勤舉廢忘乞依今月十四日聖旨賜臣殘骸使
還寤里從之 八月二十日詔丁憂人蔣嗣昌起復降
授奉直大夫復龍圖閣待制與郡 九月十日詔丁憂
人李勵起復朝請即直秘閣提舉陝西都平貨務 三
年正月十八日御筆右武大夫明州觀察使有容恩殿
勾當翰林書藝局高中立為祖母身亡係長孫本局不
可闕官已解官扶服特與免持服先次供職 二十二
日御筆武功大夫京西洛口都大提舉曹曦近為母士
可特與免持服立便依舊供職 二十四日詔持服人

前朝奉大夫戶部侍郎虞燮特起復龍圖閣直學士知
杭州明日改知鎮江府 四月五日起復正奉大夫
王華為延康殿學士河南尹 九月十四日以隨龍人
起復通侍大夫成防禦使提舉萬壽觀郭偉階官滿和
州防禦使 二十二日江浙淮南等路宣撫司申據辛
興宗昌宗企宗道宗四人狀申為父叔獻物故乞解官
持服伏望聖慈特免逐人解官依舊任使奉御筆並特
起得仍舊 四年正月七日詔起復太尉江東節度使
充中太一宮使兼神霄玉清萬壽宮副使直保和殿明
堂提舉安定郡開國公梁師成可特授起復開府儀同
三司淮南節度使依前充中太一宮使兼神霄玉清萬

壽宮使直保和殿明堂提舉食邑如故 五月十七日

制持服人常德軍節度使充上清寶籙宮使直睿思殿
在京神霄玉清萬壽宮提點食邑一十六百戶食實封
四百戶譚稹可持起復依前常德軍節度使上清寶籙
宮使直睿思殿在京神霄玉清萬壽宮提點食邑食實
封如故 二十三日詔起復常德軍節度使充上清寶
籙宮使睿思殿廣平郡開國侯食邑一千二百戶食實
封四百戶譚稹可特授起復太尉武信軍節度使充寶
籙宮使在京神霄玉清萬壽宮副使直睿思殿加食邑
五百戶食實封二百戶 五年正月十三日御筆高俅
父七持服係隨龍見領軍職不合丁憂可降勅照會

仍令掛服訖出參治事 三月九日詔訪聞宣教郎知
秦州成紀縣魚洗勸農有訪催科無擾境內獄訟並無
留滯到任未滿遽以憂去縣人願留可特令起復終滿
此任 十八日御筆前保和殿大學士通議大夫上清
寶籙宮使佃係隨龍之人可特起復不許辭免 十月
二十九日臣僚言伏覩邸延路經畧安撫使薛嗣昌奏
辟安府官二員承務郎何麟充司錄宣教郎張伋充士
曹何麟既免持服張伋見丁母憂乞起復舊官差注今
西陲晏然非興師之時司錄士曹非金革之任何麟張
伋非身繫重輕之人今昌乃以此市恩臣恐此風滋長
所損不細望揆理原情正嗣昌妄舉之罪詔何麟等指

七月二十日
起復武信
軍節度使
譚穎為檢
校少保
潘何主上

揮更不施行嗣昌罰銅十斤 六年四月九日持服人
前通奉大夫尚書左丞李邦彥特起復如故 靖康元
年二月二十九日邦彥以觀文殿大學士中太一宮使
乞持餘服從之 六月一日詔丁憂人前降授中奉大
夫充檢校閣待制知慶陽府王似特起復還任三日御
筆丁憂人前同知入內侍省事董慤可起復依舊差
遣 八月二十二日詔持服前朝請即提舉兩浙西路
鹽香茶礬事李弼孺可特起復差遣依舊 十月十七
日起復程唐為寶文閣學士太中大夫 七年二月二
十六日詔承議郎前知衢州王晟可特起復充淮南西
路提點刑獄公事 三月一日詔待服宣義郎李邦獻

可特起復宣義郎直秘閣管勾萬壽觀 十月十四日

詔持服前中大夫直徽猷閣知相州韓蕭胄可特起復
依舊知相州 十一月一日詔持服前中奉大夫殿中

監王義叔丁祖母憂特令起復差遣依舊候卒哭日供
職不許辭免十一日起復王麟依前朝奉大夫直寶入

閣知洛州 二十八日前朝請大夫元孺起復知絳州

七年十一月二十八日臣僚言訪聞起復奉議郎通

判懷州王德居官守已素乏聲稱竊惟朝廷清明人才
衆多何必起復一汙濫不才之人而用之耶詔王德已
降起復仍舊通判指揮更不施行以上續國朝會要
國朝之制文臣諫舍以上牧伯刺史以上丁父母憂者

卷一萬九千八百二十五

皆卒哭後恩制起復內職遭喪者但給假而已其願終喪制者亦聽惟京朝幕職州縣官皆解官行服亦有特追出者惟軍職邊任給假百日供出供奉官以下願行服亦聽宗室初同此制熙寧初自副率以上並解官行服至元符元年八月詔文武臣僚除管軍及邊任取旨起復外餘並罷建炎兵興以來文武臣僚凡任邊防帥臣郡守通判總管鈐轄都監都統統制統領將副并帥司屬官隨軍轉運及一時用兵處監司郡守通判率循舊例皆取旨起復更不錄外其非此例而特起復及事畢而許持餘服者載焉

宋會要

高宗建炎四年六月二十二日起復朝奉郎御營使司幹辦官胡嶠依所乞持餘服八月十五日詔皇叔持服前檢校少保尤山軍節度使知大宗正事士儂特起復制曰方茲眷倚遽以憂聞用大宗率小宗當念維城之重以家事辭王事豈為許國之忠况值從戎固難遂服十月十六日臣僚上言先王弘情制禮父母之喪三年不從政後世為從權奪服之舉者必須執政之臣仍偶金革之變在朝廷不可闕斯人斯人亦不得已而後起馬以移孝為忠以徇國家之急務也宣和間京黼用事隳廢禮典一時大小之臣凡遭父母之喪者謂之小

撓更無戚容莫不前期干求指日起仕而苦塊之禮不
復行于有位以至于今丁時多故率皆貪生苟得而不
知伏節死義者未必不由此爾陛下紹承大統國步多
難若以時方右武而間行奪情之制固未為失但比日
以來所起之士多兆金革之故幾習宣和之風且如公
江諸帥修飭武備以捍戎人起權邦彥知江州姜仲謙
知建康府也若以邦彥為六路發運使仲謙為湖北轉
運使而起復此何理耶方面守臣訓練兵政保捍生靈
起向子謹知譚州亦可也幕職之官如南康軍簽判姜
仲恩虔州簽判盧彥樞如是之類而亦起復此何理耶
奪喪者聖王之典起復者朝廷之權命自上出起之可

也若權江西鹽香夏虞臨江軍通判王道權來州帥司
屬官鄭好仁皆賣緣請托於權三省樞密院而起復陞
下方以至孝治天下以大義責臣僚凡縉紳之流宜篤
孝廉之行豈容無耻薄於所生叨冒廩祿不自知愧此
風一扇名節委地而望其以身許國以死守官不可得
也乞一切罷去仍令三省繼自今不緣金革之事勿起
衰經之人御史臺常切覺察彈劾以聞詔權邦彥係專
委催發諸路錢糧應副行在大軍支遣外餘竝罷 十
一月四日起復朝請大夫樞密院幹辦公事王侂乞持
餘服詔係優卹死事之家特令依舊供職 紹興元年
六月十日江南東路安撫大使司參謀官下幹辦

忠厚特起
以領軍
度使
以領軍
度使
以領軍
度使
以領軍
度使

官起復迪功郎董肇言賊馬寧息乞先次罷任依舊終
滿喪制從之 十三日持服人前寧遠軍節度使充醴
泉觀使進封東海郡開國侯加食邑五百戶食實封二
百戶制曰忠於事上膺兩宮奉御之榮學以忘憂為四
姓小侯之冠自正齋壇之拜尤高戚畹之稱芝用奪東
麻之制還旄鉞之權 二年五月三日詔新知江州明
舜陟特起復限三日起發不許辭免二十四日詔承議
郎范同特與起復隨都督諸軍事呂頤浩充主管機宜
文字以頤浩言同儒學登科熟知兵事見令持服乞起
復隨出師也 十一月二十三日詔右朝請郎直秘閣
前利州路轉運判官王純特起復從江東安撫大使知

建康府趙鼎請也 三年五月二十三日詔知岳州范
寅敷特起復依舊知州事不許辭避以荆湖北路安撫
使劉洪道言水賊楊么長船直抵州岸寅敷領兵掩殺
累獲勝捷至是寅敷丁母憂特有是命 七月二十日
內降制持服左宣奉大夫守尚書右僕射同中書門下
平章事兼知樞密院事朱勝非特起復制曰鎮國家有
不撓之風致狼心之自擾措宗社于再安之地殆桑蔭
之不移進退亦復何常名實久而自正雖閱時之易遠
豈求舊之敢忘下環詔以趣歸復司之重任朝有偉
望士無閒言方指日以仰成遽執喪而去位載考流風
於典籍皆從變禮之情文是用參合國章俾還揆路

八月十八日草土未勝非言奉詔起復已行起發若到國門或有被受拜賜詔命及入城朝見并赴堂治事聚堂見客私第接見賓客未審各合着是何衣服乞下有司檢照典故明降指揮庶有以遵守閣門 書閣門令諸臣僚起復或在總麻以上親喪假應入殿者權易吉服未勝非朝見入殿并日逐赴朝殿合依上件令文竝合依舊章服太常寺勘會省記得宣和年間魯降旨起復臣僚趨朝治事竝服吉服常時鄭居中李邦彥係起復並服吉服所有今未未勝非若到國門拜受詔命并赴堂治事聚堂見客私第接見賓客並合服吉服如於私第接見賓客許服慘公服皂帶不佩魚僕頭不用

光漆從之

又言竊見紹興今有丁憂在職日給假條

格大小祥各七日朔望各一日禪五日欲乞依上條給
假內朔望仍乞趨赴遠拜二聖及朝參訖退作假遇給
假內除內降及軍期急遞機密文字外常程文字權免
書押詔依餘朔望日奏事畢退作假 四年二月七日
起復右儒林郎充都督府准備差遣李季言准詔持免
持服令軍事寧息乞解官許持餘服詔依九月二十四
日制起復在宣奉大夫守尚書右僕射同中書門下平
章事兼知樞密院事未勝非依所乞持餘服 六年八
月五日都督府參議軍事兼權川陝宣撫副使邵溥起
復尚書禮部侍郎依舊都督參議軍事 九月十四日

卷一百一十八

楊州言據持服前右朝請大夫陳桶前任京東宣撫處
置使司參謀官兼都督行府轉運使在任準告落職差
監澧州在城酒稅竊緣昨蒙朝廷起復為是軍期今未
新任條遠闕監當合待次赴官不合起復乞許依舊持
服候服闋日前去從之 十月五日詔左中奉大夫前
知榮州李平仲起復充成都潼川府夔州利州等路安
撫制置大使兼知成都府席益言平仲曾任法寺官深
曉法本官丁母憂乞起復專一詳斷諸州獄案故也
七年十一月十八日詔持服游輔特起復左朝奉郎依
舊充臨江軍使兼知潮州程鄉縣制曰方時多艱禦侮
之寄非人不可爾却敵推堅有功百里以憂去任亦既

司檢法官與
都置制以成
都潼川府夔
州利州等路
安撫制置大使
兼知成都府

踰時其奪苦塊之情勉從軍旅之事 八年正月十一

日詔資政殿學士左中大夫成都潼川府夔州利州等
路安撫制置大使兼知成都府席益起復依舊充四川
安撫制置大使兼知成都府令入內侍省差內侍一
員星夜前去宣押之任候主管職事訖回赴行在所

五月九日詔知夔州兼主管本路安撫使司公事馮康
國特起復依已得旨疾速起發前去川陝宣撫司軍前
撫諭商議軍事仍不得辭免 十一年八月三日制持
服檢校少傅寧國軍節度使充醴泉觀使張中孚特起
復檢校少傅寧國軍節度使差兩浙東路馬步軍副都
總管紹興府駐劄持服龍神衛四廂都指揮使清遠軍

承宣使提舉佑神觀中彥特起復龍神衛四廂都指揮
使清遠軍承宣使添差福建路馬步軍副都總管建州
駐劄特恩也 二十八日詔川陝軍旅事重胡世將可
特起復候指揮到不拘常制日下供職不許辭避 十
二年十一月十九日詔持服前德慶軍節度使提點皇
城司充金國報謝副使錢樞特起復依前官充金國報
謝副使 十六年三月一日詔軍官起復自古有從權
之宜近來却有非軍中職任之人規圖從軍申乞起復
殊失禮制宜行戒飭今後非見從軍不許起復如有規
求重行黜責仍令御史臺覺察彈奏先時宰執進呈殿
前司起復孝邦光充正將上曰從軍起復一時權宜然

慮不能無弊若元在本軍方可或在外計會不可不禁
止故也 十七年七月十二日詳定一司勅令所言准
詔修立諸遺喪應解官而臨時竄名軍中規免執喪者
徒三年所屬知情容庇或為申請起復者徒二年先是
宰執往呈殿前司乞武翼郎訓練官董彥起復事上曰
須見軍中不免從權許令起復若施行竄名規免執喪
有害風教可指揮禁止至是修立成法門二十三年閏
十二月十日詔持服前武功大夫貴州防禦使帶御器
械冀彥明可特與起復以被差奉使而母亡故也 二
十六年正月十四日執政進呈上曰士大夫起復非美
事所以敦孝行厚風俗唯軍中人乃可爾以上中興會

要 孝隆宗興元年正月十五日詔起復右宣義郎吳
擴除司農寺丞八月二十日詔建康府駐劄御前軍
統制肅鵬已起復仍舊管軍從宣撫使張浚請也 九
月十一日詔馬軍司前軍第十一將準脩將雷世賢起
復仍舊從軍從本司請也 二年閏十一月十六日詔
敷文閣直學士沈介起復除權兵部尚書湖北京西路
制置使明年二月介以邊城罷警請解官終喪不許
十二月十八日詔起復蕭琦子汝異汝諧差充忠毅軍
統領將官從其家所請也 乾道元年六月二日詔起
復武節大夫劉滌為浙東路兵馬鈐轄紹興府駐劄填
新置闕專一措置訓練係將不係將禁軍葺治器械

三年六月八日詔吳捱起復知金州充開達州駐劄御
前諸軍都統制四年十月十二日詔前尚書右僕射蔣
希起復授左僕射後以希懇辭有旨依所乞十一月四
日樞密院奏武翼郎步軍司後軍訓練官宋邦達以母
喪乞依條解官持服本軍契勘武翼郎宋邦達係本軍
入隊訓練官難以解官持服乞起復今依舊從軍入隊
訓練官使喚從之制詞曰禮有之三年之喪金革之
事無辟也爾職在戎行乃以不幸遭罹家難稽于古訓
命爾往復故官夫人道莫大於忠孝爾于養親者已無
及則於許國者可不勉歟六年三月六日詔王抃起復
右武大夫均州防禦使知閤門事兼客省四方館事時

卷二萬九千八百二十五

尚書省勘會三衙到三等官兵合委官措置故有是命仍專一措置揀選十二月二十四日詔葉衡起復知廬州七年正月八日臣僚言昨詔葉衡起復衛必以草土控辭合肥為淮西重鎮難久闕帥乞令婺州長吏至衡家申諭詔旨敦遣起發從之制略曰奪情之典實自從戎樞筦之司最關軍務近起復葉衡出帥淮西可改除敷文閣待制樞密都丞旨三月五日詔劉珙起復同知樞密院事五月宣撫荆襄同知院事如故十二日詔四川宣撫使司參議軍事賈和仲起復依舊在任從宣撫使王炎請也八年十二月二十二日詔池州駐劄御前前軍統制王也雄起復授左所牛衛將軍制略曰乃

父起太行之師誓平胡虜難兄當靈壁之戰亦死邊陲
是用奪三年愛母之情加千牛備身之號以上乾道會
要淳熙元年九月二十一日詔武功大夫楚州團練使
充金州駐劄御前諸軍都統制郭鈞起復依舊管軍以
鈞丁母憂乞解官持服特有是詔十二月六日詔韓彥
古起復依前朝奉大夫充秘閣修撰差知平江府二年
十月十四日詔武翼郎馬璠起復知叙州璠丁母憂以
樞密院言叙州沿邊故有是食六年五月十六日起復
知柳州雷濂奏乞俟賊平後亦請職持服詔柳冠平後欲
守令諳知風俗撫存細民所請宜不允十二年四月
十三日詔持服前檢校少保定江軍節度使侍衛親軍

卷一萬九千八百二十五

步軍副指揮使興州駐劄御前諸軍都統制兼知興州
吳挺起復 七月十二日詔持服前武翼郎權發遣
昭軍高震起復 十三年七月七日詔持服前武節大
夫鎮江府駐劄御前諸軍副都統制熊飛起復 九月
二十六日詔恭奉太上皇帝聖旨前右武大夫忠州防
禦使提舉佑神觀提點德壽宮張尹起復 十五年十
月四日詔持服前武功大夫成州團練使權知金州秦嵩
起復 淳熙十六年八月九日詔持服左武大夫保信軍
承宣使重華宮同提點關禮與起復依舊重華宮同提
點恭奉至尊壽皇聖帝聖旨故有是命 紹興二年十
二月八日詔持服前武功大夫之州刺史前軍統制兼

知鳳州總轄緣邊屯戍軍馬郭諮特與起復 開禧二
年四月二十四日詔項安世特起復朝奉郎差知鄂州
填見闕以項安世元知荆門軍丁母憂故也 二年九
月十二日詔楊九鼎丁母憂特與起復依舊知無為軍
日下還任 嘉定二年五月四日詔持服彌遠特起復
正議大夫右丞相兼樞密使兼太子少師制曰門下朕
登用英髦圖回正理矢文德洽四國方益懋於有為補
衮職事一人顧孰先於已試眷言次輔克著茂勲屬當
銜恤之時宜舉奪情之典爰敷制命誕告路朝持服前
正議大夫右丞相兼樞密使兼太子少傅奉化郡開國
公食邑三千一百戶食實封壹仟戶使彌遠精明存心

寬裕器業風推于世美謀猷允酌于時宜據進善之誠
已密扶于國本厲匪躬之操遂肅振於皇綱聿開更化
之規力任弼兵之議周旋兩地詎勉百為宗社再安方
陞底定甫擢司於軍事悵遽服於私艱覽元子之建言
即都城而賜第既終襄奉久佇來歸朕欽念治幾渺若
巨川之難濟惕懷民瘼慄乎樗櫟之易危匪資心膂之
良曷效彌縫之力載疇爾績實簡予衷與其適居處之
安備于咨訪豈若正廟堂之任期以贊衆惟藝祖文委
信元臣若累朝之優隆近弼雖云有故亦俾從權茲順
考於舊章肆特疏於新渥復還揆路庸想巖瞻總乃樞
庭名式崇於使領翼予儲極位獨亞於師承以昭眷遇

前更朱勝非
事內服終三
版終作修光
添添作添

之殊以示倚毗之切於戲保邦制治朕惟篤意於任賢
移孝為忠卿尚勉思於體國公道行則羣情可協吉士
進則庶職事修往全致主之功抑有顯親之舉先是彌
遠以所生母之喪歸葬有詔起復且賜第行在候葬事
畢疾速前來賜第居止繼詔慶元守臣以禮催趣彌遠
屢辭不允至是赴闕如都堂治事聚堂見客並從吉服
私第接見賓客服終公服卑帶不佩魚幘頭不用光添
乃用紹興三年朱勝非之例繼又奏乞祠祭行香及將
來人使到闕筵宴等特許權免起赴從之十一月十四
日詔起復胡槻依前直祕閣江西運判填見闕不許辭
免仍免回辟田宅日下交割職事時暫於吉州置司應

辦軍前財賦概先以平州寇之賞直秘閣故有是命十
三年三月二十六日詔陳孝嚴丁母憂特與起復依舊
知光州八月二十六日詔姚子材丁父憂特令起復
依舊充湖廣總領所幹辦公事以總領何炳言子材服
勤五年供億無闕邊圉緝驗戍未撤警餽糧給餉正藉
協禪乞從權奪服令子材仍舊專一應辦錢糧故有是
命十四年二月七日詔張己之丁母憂特起復依舊四
川宣撫使參議官從宣撫使安丙之請也七月二十七
日詔趙范丁父憂特與起復通直郎依舊直秘閣特差
充京湖制置司主管機宜文字趙葵特與起復承事郎
差充京湖置司準備差遣

宋會要 陳乞侍養

真宗大中祥符七年八月十五日以秘書監分司西京楊億知汝州時億以疾愈求朝謁因有是命御史姜遵疏其頃居近列擅去闕庭所宜屏迹衛茅盡心甘旨忽求領郡深屬要君請罷分符用憊著位真宗曰億本以屬疾而省母病素無終焉侍養之請昨求歸朝特授郡寄耳即命宰臣召遵諭之仁宗慶厯元年六月詔選人乞侍養者須及三年方聽于所在給文憑赴流內銓注官二年十二月詔京朝京請侍養而親疾愈者一年仍聽朝參五年四月二日舒州團練使李端願請解官侍養詔但令奉朝請凡所差任皆免之六年七月二十三日屯田郎中諸王宮侍講楊中和以母親年老乞解官侍養許之八年十一月端明殿學士知應天府李淑請解官侍養從之嘉祐六年十月十八日知杭州康衛昔言准詔侍養何黃中乞致仕令具進黃中侍養本末伏見本人勲臣之後操履甚堅棄官就養垂二十年詔除率府率致仕神宗熙寧二年五月詔大使臣尋醫侍養依京朝官例其皇城使嘉州團練使劉永壽先乞侍養候及二年許朝參先是永壽侍養候及一年其母王氏以為言有司以近制京朝官選人尋醫侍養須及二年方許朝參入選緣大使臣本有條約故

降是詔三年十一月八日詔京朝官等乞尋醫侍養依致仕條只令逐州軍勘會如別無規避即其保明本處放離任訖各申所屬差人承替通判以上差遣即候朝廷指揮四年十一月詔三班使臣尋醫侍養比文臣例候二周年方得朝參元豐二年六月九日詔大理評事崇文院校書同知太常禮院元杓等許侍養崇文院校書初無補外者上以終養故特以禮院易監嵩山中藏廟既而以御史何正臣言遂罷十七日詔京東路轉運判官尚書屯田員外郎劉定權發遣河北西路提點刑獄代太常博士集賢校理丁執禮歸館供職以便親養從執禮請也三年正月十九日審官東院言大理寺丞申天規昨乞長告訪求其父今已迎歸侍養乞許天規不候歲滿朝見從之天規少失其父至是訪得之年百歲矣閏九月八日詔太常博士王伯虎放令侍養先是御史何正臣言伯虎妻親閨南已八九年獨與妻孥寓京師伏望永棄田里以戒天下之為子者因詔福建路轉運司考定以聞本路言伯虎不迎侍父母有實故也六年六月二十四日尚書吏部言新授岷州大潭縣主簿余宗道母八十七歲床道有疾乞侍養準敕應注陝西見闕不得乞尋醫侍養長服詔依宗道所乞八年十二月十一日龍圖閣直學士知滑州盧秉以父疾聽

解官侍養 哲宗元祐元年四月十四日詔今後殿侍係歸明儒人尋醫
侍養各不限年許參班內有已授差遣或在仕人却依元路分與合入差
遣 三年正月二十四日詔守司空開府儀同三司鎮江軍節度使致仕
韓絳男朝散大夫衛尉少卿宗師為直秘閣提舉鳳翔府太平宮以絳致
仕宗師請便親養故也 徽宗大觀三年六月二十三日閤官言五月二
十六日宣義郎劉得臣垂拱殿朝見拜跪艱難詔劉得臣令尋醫 四年
閏八月十八日詔西上閤門使榮州防禦使重師敏為病尋醫可特與見
仕官轉出差提點醴泉觀 政和三年八月二十六日尚書省言訪問河
北路走馬承受焦公行到博州與弟子姦濫等事下京西轉運司差官體
量並無姦等事元係前權知博州辛朴具到詔朴令尋醫 宣和元年六
月二十五日詔柳州安置蓋揆放還令侍養 七月十八日盛并盛升並
勒停令貶所侍養以父盛彰貶單州團練使筠州安置也 二年八月
二十日朝散郎充徽猷閣待制提舉醴泉觀同修國史葉著言臣近嘗具
奏以臣父邵在逮侍下閤人之賜改授臣在外一合入差遣以便侍養詔
依所乞差知信德府 三年六月九日尚書省言檢會拱衛大夫蘄州防
禦使楊師道奏又監察御史未敢奏聞 五月二十七日夏李土旺祀黃

帝有攝太祝官敕郎方里於獻官奠酒訖讀祝文差漏多不成句詔方里
令尋醫 十七日秦鳳等路提點刑獄司言勘會在任官尋醫看親自有
成法所屬驗實無規避申奏方許離任本司今點檢原州等處官任內賦
污不法官司按舉逐官托故離任本州放令離任或縱令逃竄方行按發
比至被旨取勘却申稱離任乞行收捉欲望今後命官犯罪所屬故縱
放令離任其知通典犯人一等科罪仍於案後收罪聲說取旨詔今後命
官犯罪所屬故縱放令離任科罪等已別作施行外仰刑部行下諸路提
刑司每名各立賞錢三百貫文召人收捉 四年三月七日溫州言檢會
奉詔處分兩浙江東路知州通判應州縣等並不得陳乞尋醫致仕侍養
并請假離任已陳乞及離任者今本路監司疾速勾還本任托疾致仕者
令中書省記錄候賊平日取旨緣目下討蕩賊寇漸已平息不任據管下
官員乞致仕尋醫侍養請假及省罷未審將來大軍解嚴班師之後合與
不合依常法施行詔盜賊並已平靜自合依常法疾速申明行下 高宗
建炎元年五月一日敕應命官尋醫侍養並許召保注授 紹興六年八
月二十八日守秘書省著作郎張九成言父七十歲常苦心氣不寧乞許
侍養詔除直徽密閣兩浙東路提點刑獄公事 九年三月十五日少保

鎮南軍節度使充醴泉觀使呂頤浩乞許歸養疾詔除其長子抗直錢獻
閭添差浙東提舉茶鹽迎侍歸台州調治 三十二年正月十三日詔應
百官有親年已高而不迎侍及歸養者令在外監司按劾在內令臺諫糾
彈從臣僚請也孝宗紹興三十二年六月十三日登極赦應命官尋醫侍
養並許召保注授 乾道元年八月十一日立皇太子敕應命官因患尋
醫侍養未滿而已安居及半年已上特許參選 二年九月六日詔建康
府上元知縣李允升犯贓帥守王佐容縱尋醫特追兩官勒停建昌軍居
住十二月六日吏刑部准批下新差藤州馬陞劄子乞自今後因監司郡
守按劾及百姓論訴已經體究事在有司者不許尋醫逐郡看詳欽依所
乞從之 六年三月十八日臣僚言本臺令節文諸尋醫已除籍官年滿
乞朝叅者體量委無疾病注籍訖牒吏部閤門又令諸體量官員因疾者
牒依官局差人診視具實狀申所屬竊見石永奉郎江深前任監福州古
田縣水口鎮因病尋醫合至乾道五年十月滿一年未曾陳乞赴臺引驗
近奉旨差充瓊州瓊管司主管機宜文字係堂除其江深隱匿而來尋醫
一節冒授新仕乞罷差遣以為慢令之戒從之 四月一日吏部侍郎陳
良祐劄子契勘迪功郎前監廣州亭頭場監稅馮伺狀昨於紹興三十一

例

年七月赴部參選就殘零闕注授前件差遣未赴任間尋醫不赴今已痊
安乞赴部參選准本部告示合候銓試中到部據本人狀稱係在隆興元
年四月內條具銓試指揮之前已注授差遣尋醫不赴即非緣罪犯罷仕
之人乞放行參選本部檢照右迪功郎曹墳於紹興三十年參選就殘零
闕注藤州司法參軍未赴任間丁母憂不赴亦係在銓試指揮之前注授
續奉旨曹墳令吏部放行參選今後如有似此之人依此今本部未敢依
曹墳例詔依陳良佑劄子內理事令參部今後如有到任尋醫人不許援

宋會要

致仕

國朝凡文武官致仕者皆轉一官或加恩其子孫觀察使防禦團練使刺使及三職三班即換環衛幕職州縣官改京朝官升朝官父在者遇慶恩授致仕官其不仕者文官始大理評事武官始副率再經恩累加焉祖在而求回授者亦聽皆不給俸亦有子居要近加賜章服者 太祖建隆二年四月潁州團練使范再遇為左金吾衛大將軍致仕再遇本江南僞泗州刺史周顯德中太祖率兵直壓其壘再遇以城降累遷至團練使至是再遇仍別降書勞問 三年八月詔大理卿劇可久

為光祿卿致仕可久年過七十無請老之意故特有是命 乾德元年閏十二月詔曰羣官列位自有通規舊德來朝所宜加禮且表優賢之意用敦尚齒之風自今一品致仕官曾帶平章事者每遇朝會宜綴中書門下班先是太子太師致仕侯孟等來陪郊祀孟等皆嘗為使相帝優待之特降是詔 二年二月詔自今應藩鎮帶平章事求休致者每遇朝會宜令綴中書門下班先是鳳翔府節度使兼中書令王晏自藩鎮致仕故有是詔 開寶三年三月以草澤王昭素為國子博士致仕昭素通經業居酸棗縣年踰八十不仕帝聞其善講說召對使殿中講易以衰老求還鄉里故有是命 六年

五月以兵部侍郎參知政事劉熙古為戶尚部書致仕
足疾故也六月以太子詹事楊昭俊為工部尚書致仕
九年六月以國子博士周維簡為虞部郎中致仕仍
以其子縉為塾屋縣主簿 太宗太平興國元年天雄
軍節度兼侍中李繼勳授太子太師致仕朝會許緌中
書門下班 二年七月前翰林學士禮部侍郎魚崇諒
授金紫光祿大夫兵部侍郎致仕閏七月以布衣孫守
彬為左領衛將軍致仕 八年七月檢校太師行右金
吾衛上將軍判街仗事邠國公王彥超授太子太師致
仕依舊給本官俸料 雍熙二年王彥超進封邠國公
謂人曰吾聞朝廷之制七十致仕吾今六十九矣當自

知止足之分於是年冬末預修求致政表凡僕隸之食者皆罷遣之明年果遂其請以太子太保致仕彥起歷仕累朝領節制者九所至雖無異政而能以富貴知止人以此多之出書林事類王彥起歷數鎮節制罷為金吾止上將軍與李昉宋白善一日昉白詣之時彥起年六十九歲謂昉白曰人言七十致仕出何書昉曰禮大夫七十而致仕若不得謝賜之几杖杖於朝蓋筋力尚可從政時君所賴也彥起曰我前朝舊臣於時無用豈可食爵位而昧廉耻遂託白草求致仕表來年假開日之上再表得請以太子太保致仕給上將軍俸居常白衣出入故舊家僕從簡省無童騎性嗜張進酒軟骨魚

語親舊曰有此二物吾當不召自往矣張進者建州人
隸內酒坊善釀味絕美品在法酒之亞善飲者多好之
出楊內翰設苑吳虔裕傳虔裕性簡率發言多輕肆右
金吾上將軍王彥超告老得休致虔裕嘗語人語曰我
縱儻仆殿階下斷不學王彥超七十使致仕人傳以為
笑此生隨秒雍熙二年三月十九日以前天成軍掌書
記事高頔為左補闕致仕仍賜錢十萬擢其子南金高
第以南金舉學究自陳其父年八十四無存養者乞賜
一第太宗以問侍臣宋琪以頔薦介有行對帝曰吾早
知其為人惜已不能從政不可疆起之即拜是命端
拱元年閏^{五月}以青州錄事參軍麻希夢為工部郎致仕希

夢年九十五齒髮不衰帝聞而召至闕下對於便殿面
賜金紫因有是命 端拱初太宗詔訪高年青州錄
事叅軍麻希夢年九十餘居臨緇召至闕下延見殿使
賜坐語極從容詢及人間利害對之甚詳多蒙聽納他
日訪以養生之理對曰臣無他術唯清心寡欲節聲音
薄滋味故得至此詔以為尚書工部郎中致仕賜金賜
工部好學善訓子孫于景宗興國中登進士甲科孫溫
基溫舒祥符中相繼舉進士第為天下第三人而天下
稱麻氏教子有法出江少虞類苑淳化元年五月詔應
曾任文武職事官恩許致仕者並給半俸以他物充於
所在州縣支給十一月以水部員外郎何允昭為駕部

員外郎致仕從其子殿中丞直史館士宗之請也 至
道元年三月前和州歷陽縣主簿李黃授著作佐郎黃
子虛已任殿中丞太宗知其能政命知遂州仍賜五十
萬令養其祖母又以黃年高特有是命五月前崇儀副
使王得一為左衛大將軍致仕七月鴻臚卿慎知禮為
工部侍郎致仕 真宗咸平元年正月審刑院評議官
監察御史韓見素為刑部員外郎致仕見素薄於榮利
時方年四十八表求休致真宗以其年尚少惜之宰相
言近世朝行之中躁競好進者多知止求退者少如兄
所請亦是激勸風俗遂授焉十一月以職方郎中沈繼
宗為將作少監致仕繼宗列官中外以貴家子權出任

稱疾假滿故有是命 二年閏三月以卓澤陳廣為將
作監丞致仕賜袍笏廣獻喜雨詩復上書言事帝召見
問其願仕否對曰臣年七十四筋力衰耗乞歸田里故
有是命 三年八月殿中丞國子監直講崔頤正以本
官致仕仍舊直講頤正老且病目不任朝請以耆遂需
故遂其優閑而不罷講誦之職 四年五月以翰林學
士吏部郎中朱昂為工部侍郎致仕帝以昂久在左右
特加優禮舊制致仕官止門謝昂特召對于便殿命坐
久之賜銀器二百兩帛三百匹詔行日給以驛券令本
府歲時省問如有章奏許附驛以聞命其子太祝正辭
知江陵府公安縣使得就養發日又賜宴於玉津園翰

林學士侍讀侍講學士知制誥三館祕閣官皆預仍詔
賦詩餞行 朱昂晚以工部侍郎懇求歸江陵適年方
允止令謝於殿門外後詔賜坐時方劇坐暑恩旨寵留
詔秋涼進程時吳淑贈行詩有漢殿夜涼初閣筆諸宮
秋晚得懸車之句尤為中的錫燕玉津園中人傳詔令
各賦詩為送若李承旨維有清朝納祿猶強健白守還
家正太陳文惠公堯佐部吏百函通爵里送兵千騎過
荆門之篇四十八篇皆警絕一體朝論榮之弟協亦同
隱皆享眉壽家林相接謂之諸宮二疎荆帥陳康肅堯
咨表其居為東西致仕坊八十二堯門人請謚正裕光
生世皇朝類苑五年五月詔文武官七十以上求退者

許致仕因病及歷任有職犯者聽從便時主客郎中謝
泌言自今求致仕者如有清名及粗展勞効乃可聽許
故因泌奏而有是命九月倉部員外郎武信軍節度掌
書記郭成範為司封員外郎致仕以其子太廟齋郎韜
玉為壽州霍邱縣主簿成範在惟吉府中老病赴朝陪
於殿門閤門使以聞詔特原之成範因求致仕且述家
貧願得一子食祿給養帝憫許之十二月進士李成信
授將仕郎守將作監丞致仕成信即知樞密院王欽若
妻父也欽若為言故有是命 景德二年三月二日以
都管員外郎致仕潘華為屯田員外郎華即江南內史
舍人佑之子以疾致政至是上書闕下求復朝列帝憫

佑志歟故命華以舊官四月九日以虞部員外郎安定
郡王府翊善董潯為都官員外郎致仕賜其子經進同
士出身 大中祥符二年正月詔差定賜文武致仕官
帛數大將軍三十匹將軍郎中二十匹員外郎十五匹
率府副率國子博士而下十匹大理寺丞而下七匹以
東封敕書恩例也二月以許州參軍王中正為左衛將
軍致仕仍給全俸 四年三月以龍圖閣待制王曉兄
序為國子監助教致仕序年七十餘晚乞推恩也 五
年八月以左僕射張齊賢為特進守司空致仕 六年
七月六日景福殿使新州觀察使劉承規為安遠將軍
節度觀察留後左驍衛上將軍致仕兩使留後非致政

之官至於上將軍國朝以來罕曾除拜帝以承規建事
三朝有勤劾故授之仍賜手詔無論 九年正月詔京
朝幕職州縣官求致仕者令審官院吏部銓檢勘歷任
具有無贓犯以聞十月禮部郎中新授京西轉運使胡
則言父年七十八任國子博士致仕乞加朝散階詳之
天禧元年七月十七日以祠部郎中胡旦為祕書少
監致仕又以其子繁書試祕書省校書郎旦自陳目疾
求授其子官故特有是命八月楊州言虞部員外郎致
仕周令環年踰九十無人供侍有孫男化元見任海州
東海縣尉乞移授楊州判司簿尉以慰衰殘許之 四
年正月以戶部侍郎致仕馮起為兵部侍郎太常少卿

致仕劉翼為司農卿將作少監致仕柴德芳為將作監
並依前致仕仍詔許入辭舊例門辭中書取旨特有是
命五月十日以靜難軍節度使檢校太傅王嗣宗為檢
校太尉左屯衛上將軍致仕嗣宗病蹇不能履地凡再
表願一朝覲即歸田里及至京彷徨累月求再領許州
朝議以其耄疾特有是命 孫集賢冕天禧中直館幾
三十年江南端方之士也節槩清直晚守姑蘇甫及引
年大寫一詩於廳壁詩云 人生七十鬼為隣已覺風
光屬別人莫待朝廷差致仕早謀泉石養閑身去年河
北曹逢李見素今日淮西又見陳或云陳莊二公被差
者也寄語姑蘇孫刺史也須料檄老精神題畢拂衣歸

九華以清節高操羞執百事之類朝廷高其風許再任
詔下已歸竟召不起王與公欽若里閑交素也與公天
禧中罷相以宮保出鎮餘杭艤舟蘇臺歡好款密醉謂
孫曰老兄淹遲日久且寬裘當別致拜聞公正色答曰
二十年出處中書一素後潦倒江湖不預一點化筆殆
事權屬他出廟堂數千里為方面始以此語見悅得為
信乎與公愧謝解舟遂行見宋江少虞類苑仁宗天聖
三年二月翰林學士權三司使公事李誥言父兵部員
外郎致仕文捷年七十有五乞臣外任以便侍養詔不
許特賜文捷金紫天聖三年左正言孔延魯法當遷
官願不遷而為其父尚書祠部郎中致仕勉求紫章服

上曰子為父請可從也特賜勉紫章服宰相王欽若等
曰廷魯所陳足以厚風俗陛下從其請實資孝治也宋
朝事實孫宣公奭以太子少傅致仕居於鄆一日置宴
御詩廳仁宗嘗賜詩刻石所居之廳辟語客曰白傳有
言多少朱門鎖宮宅主人到了不曾歸今老夫歸矣善
動于色復顧石守道諷易離卦九三爻辭且曰樂以忘
憂自得小人之志歌而鼓缶不與大耄之嘆公以諄德
與學勸講禁中二十餘年晚節勇退優游里中終始全
德近世少比江少虞類苑四年四月吏部言據太子中
舍致仕曹湛等乞依敕文叙服色緣致仕官每遇車恩
轉官加恩與常朝官事體並同未敢聞奏詔依例磨勘

以閏九月監察御史曹修古言伏聞七十致仕載在禮經中代以還貪榮尤甚昔唐太宗患其如此故特下詔書再三責論仍令内外文武官年在致仕抗表去職者宜在本品見任之上蓋欲其知恥而退也近年以來中外臣僚有年僅八十尚未辭官既心力之盡衰何職務之能濟鍾鳴漏盡未悟夜行之非日暮途遠多作身後之計或貪財暴法或見姓書名以此臨民何以致理自今除元老勲賢詢議軍國自有典章外其内外文武官年七十者乞下御史臺及諸路轉運司告報逐官並許上表自陳特與轉官致仕仍依唐制本品在見任官之上不自陳乞者委審官三班吏部勘會歲數以聞特與

致仕然不獨示誠貪之道亦足崇養老之風詔御史臺
榜朝堂門及下諸路轉運司十月都官郎中熊同文以
老病自陳乞致仕有男若思若山各乞一末科出身庶
需祿仕以養殘朽詔同文守本官致仕男一人特與齋
郎仍令以後郎中休致者准此例 五年十二月以禮
部尚書集賢院學士晁迥為太子少保致仕迥判西京
留司御史臺代還三上表求休致不允又請對便殿自
陳仁宗勉從之乃給金俸又詔次子太常博士宗樸特
賜緋章服 七年八月太子少保致仕馮亮言分司致
仕官無例申發章奏咸平中朱昂致仕歸荆南許附遞
乞依昂例從之 景祐三年六月御史知雜司馬言乞

應文武臣僚年及七十者並令自乞致仕仍舊敕與一
子官如分司官給全俸若不自陳乞御史臺糾察以聞
特令致仕更不與子官及全俸其已曾陳乞有詔特留
者不在此限所貴減冗員勵曠職仍乞文臣下官審負
依舊逐漸供報年幾家狀赴臺武臣下樞密宣徽院准
此其外處以敕到日為始限滿不陳乞者亦許御史臺
糾舉詔榜朝堂 寶元二年六月詔朝官嘗犯贓而乞
致仕者自今止與轉官吏不推恩子孫 慶歷二年六
月權御史中丞賈昌朝言臣僚年七十而筋力衰者並
優與改官令致仕年雖七十而未衰及別有功狀朝廷
固留任使者勿拘此今若工部侍郎俞斌卿等乞並與

致仕詔在京者令中書體量在外者進奏院告示之又
言近嘗擇其老衰先具論奏聞中書召見詢問多不願
退切覩荆王府甥善王渙早以年德選在宮僚三載于
茲不聞曠職近以懇求解職今自請致仕引分知退深
可褒稱乞賜俞允仍優加禮秩使不願退者足以愧老
將自陳者足以勸庶候王渙致仕後錄其制詞告示中
外詔特除渙秘書監致仕 三年五月特令河陽三城
節度使同中書門下平章事楊崇勳為左衛上將軍致
仕初崇勳判成德軍而部民行賂於其親吏任昭敏李
威新使告其子內殿承制宗誨求免所犯罪事覺宗誨
等皆編管諸州故有是命明年十二月就改太子太保

六月詔曾任兩府乞致仕者自今須再上章乃聽除之
以資政殿學士韓億為太子少傅致仕因有是詔 五
年閏五月九日右領軍衛大將軍致仕高士寧言臣咸
平年中應舉及第後來自贊善大夫換右職自西上閤
門使連州刺史除致仕乞特許換文資官詔除殿中監
致仕九月詔文武官已致仕而所舉官犯罪嘗連坐者
除之 慶曆五年工部侍郎知河陽任布為太子少傅
致仕宋續通鑑長編仁宗慶曆中司徒呂夷簡固請老
戊辰授太尉致仕續通鑑長編張安壽曰呂申公夷簡
平生朝會出入進止皆有常處不差尺寸慶曆中為上
相首冠百僚起居誤忘一拜而起外間謔言呂相失儀

是天奪之魄殆將亡矣後十四日忽感風疾遂致仕以
至不起涑水記聞皇祐二年仁宗始祀明堂范文正守
杭州而杜正獻致仕居南都將侍郎希魯居致仕居蘇
州皆年耆體重范康公建言朝廷闕禮宜召元老舊德
陪位于廷於是詔南都起杜公西都起任公惠公陪祀
供帳都亭驛以待焉二公卒不至加賜衣帶器幣賜一
子出身自後前兩府致仕者大禮前率有詔召之然亦
無至者禮畢皆賜衣帶器幣焉百川學海春明退朝錄
皇祐中明堂大享時世室亞獻無官僚惟杜祁公衍以
太子太師致仕南京仁宗詔公歸以侍祠公已老手染
一疏以求免但直致數句更無踐章鋪叙之飾止以奇

戲妙堂墨臨帖行書親寫陳奏宋類苑仁宗時士遜拜
太傅鄧國公致仕詔朔望朝見及大朝會綴中書門下
班與一子五品服士遜辭朝朔望間遣中使勞問御書
飛白千歲字賜之士遜因建千歲堂嘗請買城南官園
帝以賜士遜宰相得謝蓋自士遜始宋史張士遜傳仁
宗時張存以吏部侍郎致仕凡十五年積遷禮部尚書
卒年八十八謚恭安宋史張存傳仁宗時得象以司空
致仕薨故事致仕官乘輿不臨奠至是帝特往焉宋史
章得象傳皇祐三年七月五日詔應外任少卿監以下
年踰七十的然精神昏昧不任釐務者仰轉運提點刑
獄府界提點具事狀以聞在京則委御史臺審官院准

此內有曾經館閣臺諫及提點刑獄以上職任者只令中書裁處待制以上並是朝廷選擢歷更清要進退之間務全大體如或引年得謝自當優加恩禮不須預為定制十二月二十四日詔應文武臣僚年七十以上未致仕者更不許考績或於國有功於民有惠理當旌賞者不在此限 四年二月一日詔自今應曾任中書樞密院臣僚不循例引退言事官亦不得輒有彈奏 五年九月中書檢會自來因事方乞致仕者所有合得與子恩澤內殿崇嚴班更不推恩諸司副使則於所得工降等安排今後副使致仕歷任無贓罪子孫並未有官者許奏子孫或弟姪一名內殿崇班承制更不推恩副

使以下雖犯賊但曾立戰功或因捉獲疆患賊用時獎
改官者并係隨龍及曾任近侍之臣依舊例從之 嘉
祐元年九月賜致仕大卿監以上及曾任近侍之臣粟
帛羊酒 三年十二月詔年七十而居官犯罪或以不
治為所屬體量若衝替而求致仕者更不推恩子孫
四年二月太子中允天章閣侍講管勾太學胡瑗為太
常博士致仕特賜絹百匹 嘉祐七年三月乙卯以叅
知政事孫抃為觀文殿學士同群牧制置使抃以進士
高第累官至兩制性醇厚無他才上以其久任翰林擢
為樞密副使多病志昏醫官自陳勞績求遷吏以文書
白抃抃見吏衣紫誤以為醫官因引手於案上謂曰抃

數日來體中不佳試為診之聞者傳以為笑及在政府
百司白事但對之拱默未嘗聞一言是時樞密使張昇
屢以老乞致仕朝論以抃次補樞密使恐必不勝任殿
中侍御史韓縝因進見極言其不才當置之散地抃初
不知後數日中書奏事退宰相韓琦曹公亮獨留身在
後抃下殿謂叅知政事歐陽修曰丞相留身何也修曰
豈非奏君事耶抃曰抃有何事修曰韓御史言君不知
耶抃乃頓足摘耳曰不知也因移病請退朝廷許之沐
水記聞嘉祐中有劉諷都管簡州人亦年六十三致仕
夫婦徙居賴山范景仁有詩送之云移家尚恐青山淺
隱几惟知白日長時有朱公綽送諷詩云疏草焚來應

見史橐金散盡只留書皆為時人所傳誦溫公詩話張
文懿既致仕而安健如少年一日西京看花回道帽道
服乘馬張蓋以女樂從人入鄭門監門官不之識也且
禁其張蓋以門籍請書其職文懿以小詩大書其紙末
云門吏不須相恠問三曾身到鳳凰池監門官即以詩
進仁宗遣中使錫以酒餼問勞三槐王氏雜錄英宗治
平元年七月以太子賓客掌禹錫為尚書工部侍郎致
仕禹錫老病不致仕^{任事}為御史所彈帝憫憐其博學彊記
執政召至中書示以彈文使自請而有是命八月詔自
今大卿監未嘗^任大兩省以上官因病老疾仍乞致仕者
恩澤減舊之半 治平四年五月八日神宗未改元樞

密院言年七十致仕雖有著令而臣僚少能自陳近日
內外大使臣多致監司體量昏老疾病到闕尚乞辭難
差遣者近已將老病昏昧及歷任中不曾顯立勞効及
有過犯者並直除致仕及令尋醫欲今後有年七十已
上大使臣得替并體量差替銜替者並令赴院體亮如
精神筋力堪任勾當即與開慢監當差遣委是年老昏
昧病患及有體量事迹具姓名取旨直除致仕其合得
于孫恩澤即依至和申詔約施行有曾經朝廷選任近
上委寄或曾著勞効者取旨仍仰開門曉示從之六月
八日詔皇城使果州團練使何誠用惠州防禦使馮承
用右驍驍使嘉州團練使劉保言左藏庫使昭州刺史

鄧保壽並特致仕以誠用等皆年七十已上至八十餘
歲猶在仕故也 二十八日詔勅內殿崇班郭繼勲增
加歲數責罪以其陳乞楚州監當言出職日自增十歲
也 八月十四日詔以太子中允致仕郝貳除兩使職
官候一任回與磨勘先是翰林學士呂公著言貳前任
興國軍通山縣令日為父樵年老遂乞致仕欲封父一
官不期樵卒遂扶護還蔡州西平縣本鄉於墓側負土
培墳不避霜雪行誼鄉里所重搢紳所推令父服已除
齒髮未衰乞賜旌用故有是命 孝義傳郝貳調通山
今年未五十以父樵老不第上書請致仕為父求官執
政諭使赴官而後請曰如是則可升朝籍遇恩及親矣

於是留妻子於家獨奉父行踰歲竟謝事得太子中允
以歸出宋史張文定嘗云在翰林當章郇公致仕麻命
下同宋景文往賀之因語之曰昨日受朝宣旨上眷遇
之意甚厚何遽去公曰不可待不厚時引去張文定三
入翰林慶曆五年二月初以知制誥除學士此時章文
獻為丞相明年文定除中丞十一月還復翰林七年八
月以知滁州罷此時章文獻判陳州明年郇公致仕治
平末張公乃三入為承旨此時郇公之薨久矣不致何
由當郇公致政麻也郇公罷相時文定初為學士然以
言罷無言上眷厚也 出舊聞證誤張文定父子 張
文定以司空致仕歸洛得唐裴牛橋庄有池榭松竹之

勝日與親舊觴^其間其子宗誨以秘書監致仕嘗出謁
其子言曰昔賀秘監以道士服東歸會稽明皇賜以鑑
湖以為休老之地今洛下雖無鑑湖然嵩少伊瀍天下
佳景雖非朝廷所賜皆閑逸之人所有爾大人盍以羽
服以優游何必更事請謁乎語宗誨曰吾作白頭老監
秘書而服何必學賀老作流沙之服時以為名言出洛
陽志熙寧元年二月二十六日以醴泉觀使定國軍節
度使李端愿為太子少保致仕端愿以目疾屢請休退
故事多除^太大將軍致事上命討閱唐制優加是命
十二月特詔殿中丞致仕張師溫與舊官參選先是翰
林學士王安石寄言師溫前任光州定城縣令因弟死

鄉里而母病伏枕即宜乞休致今齒髮方壯累有臣僚
奏舉使之為吏足以長民望今參選注官故有是命
二年四月樞密院言見在外任年七十已上大使臣即
令逆路轉運提刑體量以聞及今日已後直除致仕者
更不與子孫恩澤從之 五月一日以觀文殿學士吏
部尚書知徐州趙聚為太子少師致仕故事再請則許
致仕聚再請上弗許至是三請許之優者舊也 趙聚
以太子少師致仕居睢陽十五年猶以讀書著文憂國
愛民為事集古今諫諍為諫林一百二十卷奏之上甚
喜賜詔曰士大夫請老而去者皆以聲迹不至朝廷為
高得卿所奏書知有志愛君之士雖退休山林未嘗一

日忘也當置坐石以時省閱神道碑重出見自警編
蔡寬夫詩話云文忠與趙康靖公槩同在政府相得歡
甚康靖先告老歸睢陽文忠相繼謝事歸汝陰康靖一
日單車特往過之時年幾八十矣劉劇飲踰月日於汝
陰縱游而後返前輩桂冠後能從容自適未有若此者
文忠嘗賦詩云古來交道愧難終此會今時豈易逢出
處三朝俱白首凋零萬木見青松公能不遠來千里我
病猶堪醕一鍾已勝山陰空興盡且留歸駕為從容因
勝其游從之地為會老堂明年文忠欲往睢陽報之未
果行而薨兩公名節固師表天下而風流襟義又如此
誠可以數薄俗也出漁隱叢話 富公乞致仕手錄富

公除泰寧軍節度同平章事判河南府曾公亮遷昭文
殿大學士監修國史陳升之遷工部尚書同平章事集
賢大學士先是富公以介甫得君專恣常稱疾不入旬
日一入見三日復謁告如是數矣遂不復預政事求退
章數十上稱病家居宣出上殿復歸卧又出上殿於是
押入中書不視事復歸如是者以十數上乃聽之然意
頗不樂故不復得司空侍中上將許富公辭位間乃曰
卿即去誰代卿者富公薦文公上默然良久曰王安石
如何富公默然陳公履歷深於介甫而素與介甫相表
裏故先用之宋興以來宰臣有以侍郎為之而無左右
丞為之者禹偁當制奏言故事左右丞不為宰相故陳

公特遷尚書上又詔文公位在陳公之上文公辭以國
朝樞密使無位於宰相之上者獨曹利用嘗位於王曾
張知白上臣忝文臣粗知禮義不敢亂朝廷尊卑之序
上不許出司馬溫公傳家續集 每言國事富文忠公
弼雖居家而朝廷有大利害知無不言交趾叛詔郭逵
等進討公言海嶠險遠不可責其必進願詔逵等擇利
進退以全王師契丹來爭河東地界上詔問公公言熙
河諸郡皆不可守而河東地界決不可行出言行錄
杜祁公行七十歲一日請老自尚書左丞知兗州除太
子少師致仕故事曾為宰相未有以三少致仕者又兩
制以上須兩章乃可祁公一章即聽蓋當時宰相不喜

之也予為翰林學士雖獲罪猶五章始得報見東齋記事杜祁公休退居南都客至無不見止服衫帽嘗曰七十致政可用高士服乎見北川學海杜祁公嗜好吟咏致政後作林下書懷詩曰從政區區到白頭一生寧肯顧恩讎雙鳬乘鴈常深愧野馬黃羊亦過憂豈是林泉堪佚老只緣蒲柳不禁禁秋始終幸會承平日樂聖惟能擊壤謳然余不見野馬黃羊事後續唐張說傳乃見之則所謂吾肉非黃羊必不畏契血非野馬必不畏刺是也見宋江少虞類元楊惟忠邢煥以節度使致仕告由告舍人院出崇禮言祖宗時凡節鉞臣僚得謝不以文武並納節別除一官致仕熙寧間富弼以元

勲始令特帶節鉞致仕其後繼者曾公亮文彥博他人
豈可援以為例詔自今如祖宗典故出悅生通抄 十
二月四方館使嘉州團練使劉几言乞還文資致仕詔
改秘書監致仕儿以嘗在文資故有是請也 三年六
月知青州毆陽修言前知嘉州峨眉縣賀恂青土之逐
民也少舉進士慶歷中及第注峨眉令未行間以祖母
老疾遂侍養因之不復仕宦迨今二十餘年守道安貧
行著鄉里伏見推恩致仕官優以俸給恂乞一朝官致
仕詔除大理寺丞致仕 十二月二十五日編修中書
條例所言人臣非有罪惡致仕而人君視之如舊
謂士多昧利而不知退轉官蓋已謂士多昧利而不知退轉官
之人欲加優恩以示勸獎推行已久且合依例施行至

於舊例兩省正言以上官三班使臣大使臣橫行正任等並不除為致仕官及致仕帶職者並須落職却與優轉官資看詳別無義理緣此之故但致恩例不均如諫議大夫以不可改給事中並轉工部侍郎乃是起轉兩資又如吏部尚書只除太子少保工部尚書亦除太子少保乃是起轉六資至如知制誥待制官卑者止除卿監緣知制誥待制待與遇非與卿監為比今他官致仕皆得還官此獨因致仕更見退抑以至供俸官直禁本是八品除率府副率並同六品諸司副使承制崇班七品除將軍乃是三品至於節度使除上將軍防禦團練使刺史並除大將軍緣諸衛名額不一至有刺史除官

卷萬字頁五

九

却高於防禦史者今若令文武官帶人致仕者並許依舊帶職只轉一官及文臣正言武臣借職已上皆除為致仕官即不致恩例重輕不等以至選人今錄已上並除朝官經恩皆得封贈蔭補數世之親例得贖罪免役又京官致仕亦並轉一官為光祿寺丞若令錄職官却除太子中允或中舍殊未允當及進納出身人例除京官至有經舉恩遷轉至陞朝官者類多是兼并有力之家却免州縣諸般色役及封贈父母如京官之制除衙前外亦免自餘色役尤為優渥兼俸魚條制繁雜無所過從如錄事參軍或除衛尉寺丞或除大理評事或除奉禮郎恩例既如此不同可以因緣生弊今定進納人只比

流外人例除佐官致仕以上俸祿並乞下三司編修敕
令所先次將舊例比附裁定其刺史以上使印及節度
使旌節仍令所司收納其年未七十非因過犯而致仕
之人却聽仕宦舊有例而無條令亦修定凡文臣京朝
官官以上武臣借職以上各轉一官帶職仍舊內舊條
許不轉官乞親屬恩澤者依舊條選人並依本資序轉
合入京朝官進納及流外人判司簿尉除司馬令錄除
別駕在京諸司勒留官依簿尉以上親賢勞舊合別據
恩者取旨歷任有入已職不得乞親戚恩澤仍不轉官
其致仕官除中書密院外並在見任官之上及致仕三
年以上元非因過犯年未及七十不曾經叙官及陳乞

得親屬恩澤却願仕官并許進狀叙述并有人薦舉者
各依原資序授官其才行為衆所知朝廷特有任使不
拘此法並從之四年六月十一日以觀文殿學士兵
部尚書知蔡州歐陽修為太子少師觀文殿學士致仕
帶職致仕自修起歐文忠內制集序歷記其為學士
時事幸藏其藁以為退歸設笑之資略云京竹簞之暑
風曝茅簷之冬日睡餘支枕顧瞻玉堂如在天上時覽
所載以誇田大野老士大夫誦之蓋願欲為公而不
可得也然公屢請得謝歸下及年而薨未必能此志而
余何者尋出公後亦復掛名於石刻之末暑風冬日享
之此地方十有一年如公所云實飽之矣但比歲戎馬

之餘觸事興念不能盡終前日之志為可恨每念為學
士者不為不多未必皆知此適如公知之而不及享余
事之而不久則天下如意事豈易得耶出夢葉得避暑
錄話 歐陽文忠公在蔡州屢乞致仕門下生蔡承禧
因問言曰公德望為朝廷倚重且未及引年豈容遽去
也公答曰脩公平生名節為後生楷式盡惟有進退
以全晚節豈可更俟驅逐乎初公在亳已六請致仕比
至蔡適年復請四年以觀文殿學士太子少師致仕公
年未及謝事天下益以高公公昔守潁上樂其風土因
卜居焉及歸而居室未完處之怡然不以為意出自警
編 歐陽文忠公與韓子華吳長文王禹玉同直玉堂

嘗約五十八歲即致仕于華書於柱上其後過限七年
方踐前志作詩寄于華曰俗諺云也賣弄得過裏其詩
曰人事從來無處定世途多故踐言難誰知潁水閑居
士十頃西湖一釣竿墨莊漫錄 歐陽文忠公自啓官
至為兩府凡有建明於上前其詞意堅確持守不變且
勇於敗為王荊公嘗歎其可任大事及荊公輔政多所
更張而同列少與合者是時歐陽公罷參知政事以觀
文殿學士知蔡州荊公乃進之為宣徽使判太原府許
朝覲意在引之執政以同新天下之政而歐陽公懲濮
邸之事深畏多言遂力辭恩命繼以請老而去荊公深
歎惜之見魏泰東軒筆錄 熙寧四年呂誨表乞致仕

有曰臣本無宿疾偶直醫者用術乖方不知脉候有虛實陰陽有逆順診察有標本治療有後先妄投湯濟劑率任情意差之指下禍延四肢寔成風痺遂難行步非徒憚跼盤之苦又將虞心腹之變勢已及此為之奈何雖然一身之微固未足卹其如九族之托良以為憂是思逃祿以偷生不俟引年而還致於戲獻可之論可謂至矣 十二月五日以潭州鎮寧軍節度觀察留後劉渙為工部尚書致仕然銳於進取方開拓洮岷封安南渙既老猶露章請自效不報卒年八十一出宋史劉渙傳 五年六月十八日詔守太傅兼侍中致仕曾公亮令入謝故事致仕官不入謝上以公亮舊相追事三朝

故令入謝仍依見任夫賜優老臣也 曾魯公公亮自

嘉祐秉政至熙寧中尚在中書年雖甚高而精力不衰

故臺諫無非之者惟李復圭以為不可作詩曰老鳳池

邊蹲不去鷄烏臺上禁無聲未幾魯公亦致仕而去

自警編 范蜀公自翰林學士以本官戶部侍郎致

仍居京師同天節乞隨班上壽許之遂著為令韓康公

元祐二年以司空致仕太皇太后受冊乞隨班稱賀而

降詔免赴二者不同如此出洪邁容齋三筆 范蜀公

乞致仕章四上未允第五章言臣所懷有可去者二謂

言青苗不見聽一可去薦蘇軾孔文仲不見用二可去

章既上遂得請 景仁曰吾前舉蘇軾充諫官後舉孔

丈仲賢良方正可謂無負朝廷矣乃上奏乞致仕仍乞
不遷官以贖二人之罪 又景仁五章請致仕且辯蘇
軾孔文仲之無罪語頗侵介甫介甫怒故不遷官且命
蔡仲達為責詞有詆欺要君之語介甫猶不快更命王
勝之介甫自加改定極其醜詆范景仁乞致仕錄 范
公景仁既退居有園第在京師專以讀書賦詩自娛客
至無貴賤皆野服見之不復報謝故人或為具召之雖
權貴不拒也不召則不往見之或時乘輿出遊則無遠
近皆往嘗乘藍輿歸蜀與親樂舊欽賑施其貧者周覽
江山窮極勝賞期年然後返年益老而視聽聰明尤體
尤堅呼鳴呼使景仁枉道希世以得富貴蒙屈辱任憂

患豈有今日之樂耶則景仁所失甚少所得殊多矣詩云惟悌君子神所勞矣又曰樂只君子遐不眉壽景仁有焉元祐初首以詔起公曰西伯善養二老來歸漢室卑詞四臣入侍為我強起無或憚勤天下望公與溫公同升矣公辭曰六十三而求去蓋以引年七十九而復來豈云中禮卒不起出自警編王素傳素累官至工部尚書仍故職致仕故事雖三公致仕亦不帶職朝廷方新法制素首以學士就第卒年六十七諡曰懿敏出宋史陳恭公執中初罷政判亳州年六十九遇生日親族往往獻老人星圖以為壽獨其姪世脩獻范蠡遊五湖圖且贊曰賢哉陶朱霸越平吳名遂身退扁舟五

湖恭公甚喜即日表納節明年累表求退遂以司徒致仕自警編 張鄧公致仕居京師呂申公奏請率二府賀之公即席賦詩有人問此會應無此何必東山訪謝安之句出類說 元豐三年閏九月九日詔自今致仕官領職事官許帶致仕若有遷轉止轉寄祿官若止係寄祿官即以本官致仕其見任致仕官除三師三公東宮三師三少外餘並易之 二十六日前忠武軍節度推官知滁州來安縣孫侔為通直郎致仕侔上言尋醫已二十二日乞致仕特除之 十一月二十七日詔太子少師致仕李端愿故獻穆大長公主之子自致仕後特給節度俸見錢之半餘人不得援創 初端愿以

太子少保致仕詔給節度使俸錢之半至是驅磨請受
官以謂非前任兩不當得見錢增請錢萬餘緡端愿自
陳故有是詔 五年四月七日大名府安撫司言宣德
郎致仕常昇依京官致仕例給以半俸從之昇以母李
年百有十歲昇累歷責任以母老不能之官遂求致仕
家素再貧遇歲饑無以為養故有是命 八月二十五
日詔江西提舉錢鑄朝議大夫錢昌武致仕坐妄奏江
東提舉鑄錢李棠處置乖方當徒二年會赦而昌武年
七十二故有是命同日詔恩州總管信州團練使孫吉
滄州總管辰州團練使劉閔等並以年齒高令致仕
十一月五日詔承務郎及使臣已上致仕嘗以戰功遷

官者俸錢衣賜並全給餘歷任無公私罪事理重及贓
罪給半因過犯若老疾體量致仕者不給非戰功而功
狀顯著奏裁元豐五年文潞公以太尉留守西都時富
韓公以司徒致仕文潞公慕白樂天九老會乃集洛中
公卿大夫年德高者為耆英會以洛中風俗尚齒不尚
官就資聖院建大廈曰耆英堂命閤人鄭奐繪像堂中
時富韓公年七十九文公與司封郎中席汝言皆七十
七朝議大夫王尚恭年七十六太常少卿趙丙祕書監
劉几衛州防禦使馮行己皆年七十五天章閣待制楚
建中朝議大夫王某言皆年七十二太中大夫張問龍
圖閣直學士張燾皆年七十時宣徽使王拱辰留守北

京貽書潞公願預其會年七十一獨司馬溫公年未七十文公素重其人用唐九老狄兼謩故事請入會溫公辭以晚進不敢班文富公之後文公不從令鄭奐自謩幕後傳溫公像又之北京傳王公像於是預其會者凡十三人文公以地主携妓樂就富公宅作第一會至富公會送羊酒餘不出餘皆次為會洛陽多名園古剎有水竹林亭之勝諸老鬢眉皓白衣冠甚偉每宴集人隨觀之文公又會為同甲會司馬郎中旦程太中珣席司封汝言皆丙午人也亦繪像于資聖院其後司馬公與數公又為真率會有約酒不過五行會食不過五味唯菜無限腴豐議違約增飲食之數罰一會皆洛陽事

也洛之士庶又生祠潞公於資聖院溫公取神宗送潞
公判河南詩隸于榜曰好瞻堂塑公像其中冠劍偉然
都人事之甚肅出自警編元豐末文潞公致仕歸洛
入對時年幾八十矣神宗見其康強問卿攝生亦有道
乎潞公對無他臣但能任意自適不以外物傷和氣不
敢做過當事酌中恰好即止上以為名言出石林燕語
告老辭闕元豐七年春文太史告老奏乞赴闕親辭
天陛庶盡臣子之誠既見神宗即日賜宴顧問溫密留
京師一月凡對上者五錫燕者三賜詩再顧問不名稱
曰太師寵數優異近世無比按文潞公本傳云熙寧
六年拜太子致仕元祐元年復以太師平章軍國重事

五年復以太師河東節度使致仕位將相五十餘年編

歷公輔年九十二歲而薨詳見七秩即鉞下貢父劉

公作給事中時鄭穆學士表請致仕狀過門下省劉公

謂同舍曰宏中請致仕為年若干也答者曰鄭年七十

三矣劉公遽曰慎不可遽其請問曰何故也劉曰且留

取伴八十四底時潞公年八十四再起平章事或云潞

公聞之甚不懌究中穆字也見張文潛明道雜志 宰

相致仕從容進退享有高壽其再著者六人張鄧公八

十六陳文惠八十二富韓公八十一杜祁公八十李文

定七十七龐穎公七十六文潞雖九十二而晚節不終

士論惜之張鄧公仍自相位得謝尤為可貴見葉夢得

避暑話 呂許公以太尉致仕張鄧公曾魯公並以太
傅致仕陳恭公以司徒致仕李相昉張相齊賢章郇公
宋鄭公富韓公並以司徒致仕出百川學海 七年五
月二十九日詔文臣中大夫武臣諸司使以下致仕更
不加恩 元絳傳絳以太子少保致仕神宗眷眷命之
曰卿可營居京師朕當資金幣且使耆寧仕進絳曰臣
有田廬在吳乞歸鬻之即築室都城得望屬車之塵幸
矣敢冀賜耶既行追賚白金千兩敕以蠶還絳至吳踰
歲以老病奏恐不能奉詔三年而薨年七十六贈太子
少師謚曰章簡出宋史 何鄧傳神宗時鄧以尚書右
丞致仕卒年六十九見宋史 故事職事官以告老得

謝受命即行不入謝辭爲其致爲臣而去也 神宗初
李少保東之自侍讀致仕上特召對延和殿命生賜茶
退皆講讀官燕餞於資善堂後數日李侍郎受繼去亦
用東之故事召對賜燕二人皆英宗經筵舊臣故禮之
特厚非常例也當時謂之二李東之文定公子素忠謹
樂易受亦謹慎長者云 真宗朝張齊賢王嗣宗爲起
致仕皆謝辭起乃自鄆入覲此云不入謝辭非也 治
平四年四月李東之致仕九月李受致仕此云後數日
非也 咸平三年翰林學士朱昂奏歷八年翰林院侍
讀學士楊偕皆以致仕召對賜宴又元豐七年文潞公
既致仕入覲仍賜宴則召對賜宴非特二李也富鄭公

謝致仕恩命云已蒙指揮特放朝謝魚以病廢無由暫
至闕下一對天光 宇文紹奕燕語考異 李東之李
受自侍從請歸老先公時在經筵因而奏曰東之等尚
可陳力而亟請歸近年士大夫貪冒爵祿年踰禮經而
知止者多矣望陛下稍加恩數以勵風俗已而詔就資
善堂會經筵官賜錢內出珍果名花巨觥酌勸時人榮
之比之二疎見濟美集 宋李受字益之其先自長沙
徙江州登天聖五年進士第累官至龍圖閣學士給事
中引年乞歸廬州以刑部侍郎致仕詔王珪司馬光范
鎮呂公著傅卞宋敏求楊繪王獵孫思恭錢飲資善堂
又賦詩送之內出金花異果錫賚甚富 溫退公居於

洛十七年荆公罷政歸金陵亦十餘年溫公不唯天下
重望歸之其心樂道真得退居之適荆公不唯罪公議
其心負愧良多身雖逸而心無一日之樂觀二公出處
可以為鑒見經鉅堂雜志 雪川倪思正父 范忠文

公與司馬文正公平生論智識談論趣向除議樂一
事不同外其餘靡所不同元祐初溫公起為相忠文獨
高卧許下凡累詔皆力辭不已其最後表云六十三而
求去蓋不待年七十五而復來誰云中理朝廷從之當
是時中外士大夫莫不高公此舉而人至今以為美談
也 王荆公當國郭祥公正知邵州武崗縣實封附通
奏書乞以天下之計專聽王安石處畫凡議論有異於

安石者雖大吏亦當屏黜表辭亦甚辯暢上覽而異之
一日問荆公曰卿識郭祥正否其才似可用荆公曰臣
頃在江東嘗識之其為人才僅縱橫言僅捭闔而薄於
行不知何人引薦而聖聰問知也上出其章以示荆公
心恥為小人所薦因極口陳其不可用而止是時祥正
方從章惇辟以軍功遷殿中丞及聞荆公上前之語遂
以本官致仕出西浦舊園 韓忠憲公平日常語子弟
曰進取在於止足寵祿不可過溢年若至六十可以退
身謝事歸守父母墳墓則是忠孝兩全矣及公薨其子
康公服既闋將造朝自誓於墓前曰仕宦至六十決當
乞歸四里洒掃墳壠期於不墜先訓及熙寧中以觀文

文殿學士守南陽年五十九矣遽欲謝事又以自來大
臣引年往往不即賜可徒奏牘累上旋復視事故先手
疏具出遺誠及誓於墓之事於上且曰昔晉王羲之為
會稽太守去郡不仕亦嘗自誓於父母墓前朝廷以其
誓苦不復召之臣今志願雖與羲之頗殊然誓於先臣
墓前則無異延延矣東晉故不足以比隆聖時所以保全臣
下一節斯亦可尚臣區區之志中外士大夫多有知者
即非臣今日輕有去就妄干退閑也然章屢上終不允
迄不得如其志及元祐初方致仕時年七十五矣故士
大夫以退為難 哲宗元祐二年七月二十八日詔端
明殿學士光祿大夫提舉嵩山崇福宮范鎮遷銀青光

祿大夫仍前職致仕從其請也 四年八月十七日詔
應乞致仕而不願轉官者授勅後本州二百日內取索
陳乞文狀保明繳奏如違鋪違滯致出限者更展五分
日限限滿不到而亡沒委所屬保明詣實以聞當與推
恩中大夫至朝奉朗及諸司使陳乞本宗有服親一人
蔭補恩澤橫行諸司副使見有身自蔭補人及內殿承
制崇班閣門祇候見理親民并承議奉議郎許陳乞有
服親一人恩例中大夫中散大夫諸司使帶遙郡者蔭
補外準此即朝奉朗以上及諸司使雖未授勅而身亡
者在外以乞致仕狀到門下省日在京以得旨日亦許
陳乞有服親一人恩例 六年五月六日監察御史徐

君平言文臣致仕以年七十為斷而武臣年七十者猶與近地監當至八十乃致仕願許其致仕之年如文臣法而給俸從之 七月六月三省言張方平元係宣徽南院使檢校太傅太子少師致仕元豐官制行廢宣徽使元祐三年復置儀品恩數如舊詔張方平依舊帶宣徽南院使致仕 十二月十四日戶部言乞今後應致仕官有戰功曾經轉兩官以上者並許支給全俸從之 十五日詔今後應歸明人乞尋醫侍養致仕之類令所在具奏聽旨 哲宗元祐六年國子祭酒鄭穆三上陳乞致仕詔穆提舉洞霄宮給事中范祖禹言穆雖年過七十精力尚強自為布衣閩中士人稱四先生穆其

一也平生歷官多掌學校在王府十餘年持身清謹未嘗有過擢居左省議論不苟復為祭酒多士矜式旋觀其人始終無闕年耆德茂力求引去在穆進退誠為可榮而為朝廷計則可惜也願留穆舊職以示朝廷貴老貧賢之美不報太學生五千餘人詣丞相府請留亦不報見續通鑑長編 紹聖三年四月十五日吏部言官員乞致仕比及奏畫出告必有住滯以致身亡枉有隔礙恩澤兼不轉官不須出告詔文武官該轉官致仕依舊外其餘守本官致仕者並絳敕更不給告內因致仕合該乞恩澤人更不具鈔令尚書省通書三司入熟仍不候印畫其不該恩澤人依舊具鈔 五月二日詔

自今應官員丁夏中不許陳乞致仕從吏部請也 八

月二十三日朝散郎致仕鄒極言準告落致仕除倉部

員外郎伏望許臣依前守本官致仕從之 四年二月

二日資政殿學士太中大夫提舉江寧府崇禧觀王存

表乞致仕制曰存在元祐之初論事附會可特授右正

議大夫依前職致仕其陰補恩澤方頌執政時見哲宗

年幼諸臣太紛紛常曰君長誰其任咎也耶每大臣奏

事但取決於宣仁后哲宗有言或無對者惟頌奏宣仁

后必再稟哲宗有宣諭必告諸臣以聽聖語及貶元祐

故臣御史周秩劾頌哲宗曰頌知君臣之義無輕議此

老蔽宗立進太子太保爵累趙郡公建明靖國元年夏

蘇頌傳
紹聖四年
太子少師
致仕

至自草遺表中日辛年八十二詔輟視朝二日贈司空
出宋史 蘇魏公為宰相因爭賞易復官事持之未決
御史楊畏論蘇故樞詔令蘇即上馬乞退請致仕呂微
仲語蘇可見於上辯之何遽去蘇曰宰相一有人言使
為不當物望豈可更辯曲直宣仁力留之不從乃罷以
為集禧觀使自熙寧以來宰相未有去位而留京師者
蓋恩恩也紹聖初治元祐黨人凡嘗為宰執者無不坐
貶惟子容一人獨免 元祐宰相韓縝執政李清臣許
將紹聖以前皆無他李許仍再執政此云紹聖初治元
祐黨人嘗為宰執者無不坐貶惟子容獨免非也出儒學
悟 元符元年九月十五日詔朝散大夫張壽特令致

仕壽春夔州例得對日上察其老不任事故有是命
李公麟傳公麟為中書門下後省刑定官御史檢法元
符三年病痺遂致仕既歸老肆意於龍眠山岩壑間
徽宗建中靖國元年六月八日詔朝奉郎祕閣校理致
仕李潛通直郎致仕並落致仕乘驛赴闕引對皆以曾
筆鄒浩薦其學行故也 崇寧四年閏二月六日尚書
省言朝散請朝散朝奉郎因病致仕須親授敕方許任
子有不幸地遠不及親授者乞身亡在合給勅之後亦
聽奏補從之 大觀二年三月七日詔致仕官年八十
以上應給俸者悉以緡錢充 三年七月二十八日吏
部言宣奉大夫致仕韓忠彥言近陳乞致仕蒙恩授宣

奉大夫致仕伏覩臣僚致仕蔭補格太中大夫以上二人臣有弟之子極弟之孫顯胄欲望於文資內安排本部契勘太中大夫以上見責降充宮觀而蔭補依法並取裁緣本官係因入籍叙復差提舉西京崇福宮合依條取裁詔韓忠彥許依陳乞致仕恩澤 政和三年二月五日准西提刑司言朝散郎致仕劉淮夫昨監江寧府猶務貪汙不職監司欲行追按乃託母老申乞致仕尋乞備補其子澈為假將仕郎未幾干請求薦再任兩浙監司乃薦淮夫緣母致仕為孝除落致仕詔並令鄰路提刑司體量詣實聞奏本司今體量本官任內輪差雜作兵士量酒容縱乞沽酒人錢與監官下虞候等分

受入己並不鈴束江東運司方欲按劾本官託母年老
陳乞致仕四年三月二十五日中書省言勘會朝奉
大夫竇文閣待制提舉江寧府崇禧觀楊畏今年正月
十九日奉聖旨轉一官致仕吏部供到楊畏去年十二
月二十五日身亡係未降告已前身亡依條即不該給
付緣鄭僅呂公雅體例詔依例許給付本家出宋史
徽宗政和六年何執中致仕以太傅就第朝朔望恩數
如舊上曰自相位得謝古難其人本朝數十年無此事
執中曰惟張士遜以太傅鄧國公就第宋編年條要
七月九日廣南東路提舉學士孫璘言乞命諸州應致
仕居鄉並許赴貢士宴擇其年彌高者而傳事之使長

幼有序獻酬跪伏有禮人知里選之法孝悌之義從之
七年正月六日詔劉正夫已除開府儀同三司致仕
所有見破應干使臣祇應人從等並依舊餘依何執中
致仕所得指揮施行 五月九日高郵軍言父老僧道
等狀伏見寄居中散仕李演係知樞密院李懿之子演
三十七歲任虞部員外郎更不下磨勘轉官元豐中官
制改朝奉郎至五十七致仕退居鄉里累經朝廷恩霈
及叙封至中散大夫見年九十切見百姓王慶為年九
十近蒙朝廷賜耆德處士之號况李演係樞臣之子建
事五朝親與元孫五世相見顯屬美事乞加褒賞詔李
演轉一官賜米麵各十石可中奉大夫致仕 八月一

日安化軍節度使開府儀同三司致仕劉正夫特授安
靜軍節度使充太一宮使依前開府儀同三司落致仕
進封康國公 宣和二年六月八日詔太師魯國公蔡
京可依所乞守本官致仕依舊神霄玉清萬壽宮使在
京賜第居住其恩禮俸給之屬及見破官吏人從等並
依舊仍朝朔望許見優禮明 三年二月二十八日詔
應命官昨緣病患陳乞致仕後來所患已安堪任釐務
願再仕之人緣年限未滿未許陳乞者許經所在官司
自陳保明申吏部特與再仕命官 三月二十四日詔
資政殿學士致仕王襄惟幄舊弼緣疾去朝今已痊安
特落致仕知淮寧府 七月二十四日詔湖州進士吳

事

伯彊為承仕郎致仕以江浙宣撫司奏伯彊素有行誼
鄉里所推昨方臘侵擾率眾保城卒獲按堵故旌寵之
四年三月七日溫州言檢會奉御筆處分兩浙江東
路知州通判應州縣等並不得陳乞尋醫致仕侍養并
請假離任已陳乞及離任者今本路監司疾速勾還本
任託疾致仕者令中書省記錄候賊平日取旨緣目下
討蕩賊寇漸已平息本州據管下官員陳乞致仕尋醫
侍養請假及省罷未審將來大解嚴班師之後合與
不合依常法施行伏乞明降指揮以憑遵守施行詔盜
賊並已平靜自合依常法疾速申明行下 七年正月
七日寶文閣學士太中大夫守太子庶事兼太子侍講

李詩等言宣和六年八月十八日敕書節文應命官因
疾病陳乞致仕今已痊安不以年限滿未滿許召保官
三員委保自陳特令再仕臣等切見朝請大夫致仕傅
禧之昨任知平定軍因病陳乞所患久已痊安筋力尚
壯伏許令再仕詔與落致仕 三月二十六日臣僚言
川路文武陞朝官以疾陳乞致仕依條有司勘驗入遞
聞奏在法須候奏狀計程到闕方授致仕恩澤間有暴
疾淪歿其家遷喪不舉以俟程限殞殮失時欲望聖慈
出自宸衷川路臣僚陳乞致仕以申狀到所屬就許令
授致仕恩澤庶使遠方存歿致仕賜從之 月七日尚書
省言勘會河北東路在任文武官因病患曾乞致仕緣

下屬所審實偶致身亡不曾給降致仕敕牒或已給敕
未祇受聞身亡之人詔並興理元陳乞月日依條推恩
今後依此 八月二十一日詔侍從薦文武官落致仕
自有成法比來臣僚或以不法而求去官或因營私而
憚煩使託言疾病暫求致政夤緣干請復為再任之圖
甚非立法之本意應今後從臣薦舉致仕官再仕須究
見事實元非詐冒方得論列宜各遵守毋致違戾 九
月十二日詔中大夫右文殿修撰致仕陳知質落致仕
知隆德府以宇文虛中言其風力強敏齒髮未衰也
十一月丙子太傅王黼致仕用中丞何栗疏也未幾栗
亦奉祠文鎮罷在十月庚午此誤也當附九月甲戌黼

罷太宰時舊聞證誤十一月十一日寶文閣學士中

大夫太子詹事侍講修國史耿南仲等言竊見朝奉郎

致仕朱褒昨差提舉催促東南路本職未赴任間省罷

後來因病陳乞致仕今來日久已痊安筋力尚壯尚可

宣力未應謝事伏望特降睿旨許令再仕從之 十二

月中書舍人譚世勣等言伏見朝請大夫致仕晁說之

昨任知成州日諸司列薦狀治未召赴審察以疾乞致

仕今來年未七十精明強健可使復起付之事任欲望

與落致仕再授合入差遣詔與落致仕 十九日南郊

制應官負因病疾陳乞致仕今已痊安不以年限滿與

未滿許經所屬自陳召保官二員委保特令再仕其因

致仕受過恩例依條施行 二十三日制以保靜軍節
度使致仕种師道落致仕為檢校少保靜難軍節度使
河東北路制置使兼都統制 高宗建炎元年五月一
日赦應文武致仕官並賜粟帛羊酒曾任太中大夫觀
察使以上官者倍賜同日赦應官有因疾病陳乞致仕
今已痊安不以年限滿與未滿許召保官二員委保自
陳特令再仕 十二日詔吳玠特落致仕依舊監察御
史 十九日詔今後文武官非疾病危篤及篤疾廢疾
不能任職者不得陳乞致仕以時方艱難士大夫多乞
致仕以避事故有此詔 六月十三日赦應緣靖康元
年邊事文武官因病陳乞致仕朝廷不從所乞內有身

亡之人特許依條陳乞致仕恩澤及陳乞致仕緣道路不通不曾被受致仕救命者亦許所在州軍保明特與依條推恩 十九日詔知筠州楊允降三官致仕以允昏耄貪祿忘歸故也 七月八日詔曹大同落特致仕除淮南西路提點刑獄公事 四年五月一日詔崔汝文落致仕召赴行在指揮勿行 先是有旨汝文落致仕而言者以為從官乞身自有典禮若不得謝並宜再三固自懇祈昨汝文以其家奴狀申越州騰奏朝廷謂已危懼必於見從黃潛善庇護不問遂令致仕慢上廢法實害名教故寢前命 十日戶部侍郎葉份等言朝散大夫彊行父博學多聞清修有立兩為郡倅皆有能

聲昨在宣城當方臘擾攘之時備著勞効居官行已無
毫髮之疵不緣事故疾病慨然請老欲望許令再仕詔
依其已得致仕恩澤令吏部依條施行 八月二十四
日詔宣教郎致仕周虎臣除太常博士初虎臣以通仕
郎改宣教郎致仕吏部以法止復舊官二十七日詔特
與宣教郎孟優恩也 紹興元年六月五日趙應之自
淮南遠赴行在備歷艱險可特落致仕於還郡上轉行
一官 七月十三日武功大夫榮州團練使致仕李正
彥特落致仕與在外宮觀 八月十九日詔朝議大夫
致仕周諤特授中大夫依舊致仕以其子從事郎淵言
父諤元豐中上言乞修京城神祖籍寄姓名欲加擢用

而蔡京以父諤為范純仁之甥王覲之壻陳瓘妻兄遂
同入元祐黨籍未霑聖澤故有是命 三年正月二十
五日翰林學士知制誥蔡卞禮言近者楊惟忠邢煥皆
以節度使致仕即不曾鑠院降麻緣節度使除拜移改
加恩之類並須宣制豈有見帶節鉞致仕而獨不然此
一時之闕典也臣嘗記祖宗時凡節將臣僚得謝不以
文武並納節別除一官致仕如宗仁朝張耒授太子太
師楊崇勳授太子少保神宗朝李端愿授太子少保致
仕皆武臣也惟熙寧間富弼以元勳舊相始令特帶節
鉞致仕弼猶力辭不敢當者久之相後相繼者則曾公
亮文彥博也他人豈可援以為例也近歲以來致仕者

不問何人不復納節換官亦恐有違舊制乞令三省樞
密院討論舊典施行從之三月二十一日樞密院奏
檢討典故下項慶歷三年五月特令河陽三城節度使
中書門下平章事楊崇勳為左衛上軍將致仕初崇勳
判成德軍而部民行賂其姪宗誨求免所犯罪事覺故
特令致仕熙寧元年二月二十八日以醴泉觀使定國
軍節度使李端愿為太子少保致仕端愿以目疾請休
退故事多除上將軍致仕上命討閱唐制優加是命三
年上御集英殿策進士牛浦上移御需雲使坐延輔臣
賜茶曾公亮陟降殿陛足跌仆於地於上遽命左右掖起
之明日以病告久之進司空以河陽三城節度使兼侍

中集禧觀使五日一朝會及討夏人起公亮知永興軍
召還復為集禧觀使納節請老以太傅兼侍中致仕詔
今後帶節鉞致仕令三省樞密院遵依祖宗典故四
年五月十三日吏部言右承直郎徐師直乞將磨勘功
賞於致仕合改官上收使本部契勘承直郎無出身不
及六考致仕合改宣教郎今本官所乞蓋為父年八十
三故欲以朝官致仕庶幾經大禮日可以叙封緣本部
不曾行過似此體例詔與改轉右通直郎致仕五年
二月十五日詔左中大夫翟汝文復端明殿學士依舊
致仕九月二日詔武功大夫前涇原路走馬承受公
事致仕薛紘可差充川陝宣撫使司幹辦公事從川陝

宣撫使吳玠請也

六年四月十日詔左朝奉朗前權

通判吉州徐文中昨緣虔寇侵犯吉州迎敵脇間中槍
守本官致仕今已痊安理宜憫恤可特落致仕 七年
五月二十六日右司諫王縉言近降指揮內侍致仕李
淙令再仕提舉江州太平觀道路籍籍皆謂李淙乃童
貫之壻宣和間倚貴聲勢罪惡不可具言常奉使東南
淮浙騷動市井小人尚能言之靖康間納官建炎間致
仕已是寬恩今又再仕何耶欲望追寢前命詔李淙前
降再仕差官觀指揮更不施行 六月二十六日兵部
尚書兼都督府參謀軍事呂祉等言降授左朝散郎致
仕王次翁天資孝友履行清修年未六十浩然休退乞

與落致仕召寘朝列必有可觀詔王次翁特令再仕

十二月十四日詔端明殿學士左中大夫致仕程汝文

落致仕特授依前左中大夫充資政殿學士提舉臨安

府洞霄宮先是朝廷授汝文資政殿學士依前致仕汝

文懇辭故有是命 八年八月二十五日資政殿大學

士左通議大夫提舉臨安府洞霄張守言承右務郎致

仕丁驥昨任建康府上元縣主簿到官未幾致政而歸

恬靜安貧不改其操學行吏事皆有可觀今年方五十

四心力甚壯並無疾恙若俾復從祿仕不惟可以崇廉

退之風亦見聖朝無遺逸之士與難致士從之 十二

月五日泉州言左朝散大夫充徽猷閣待制提舉江州

太平觀持服江常疾病危篤乞候服闋日守本官致仕
詔江常候服闋日守徽猷閣待制於舊官上轉一官致
仕九年四月十三日少保鎮南軍節度使充醴泉觀
使成國公呂頤浩以疾乞除一寄祿官致仕詔頤浩除
少傅依前鎮南軍節度使成國公致仕十一年七月
十七日昭慶軍節度使開府儀同三司充萬壽觀使韋
淵奏近以久嬰痼疾有妨舉動乞守本官致仕蒙恩許
依徽宗皇帝弟陳永成例免赴朝參仰見聖主敦睦九
族之意然方國步多艱費用百出與崇寧間事體不同
所有見依兩府例合破請給人從各乞減半仍每遇痼
疾發動許從便往外郡尋訪醫藥往來並免奏聞如經

由州縣除有內外親戚許相見外並不許接見監司守
令及餘賓客詔所請恩例請給人從減半不允餘依所
乞 十二年三月九日左朝奉郎試中書舍人兼侍講
兼實錄院修撰王鈇以疾乞守本官致仕詔王鈇與轉
一官依前中書舍人致仕 五月二日起復端明殿學
士川陝宣撫副使胡世將乞致仕詔除資政殿大學士
依燕書樞密院事恩例致仕 十五年正月二十四日
資政殿大學士降授左通議大夫充江南東路安撫制
置大使兼知建康府兼行宮留守司公事張守以疾乞
守本官致仕詔與復元官依舊職名致仕 十六年正
月十八日觀文殿學士左通議大夫提舉臨安府洞霄

宮葉夢得乞致仕詔除節度使致仕 葉夢得傳夢得
知福州兼福建安撫使海寇朱明猖獗夢得或招或捕
遂平寇五十餘群然頗與監司異議上章請老特遣一
官提舉臨安府洞霄宮尋拜崇信軍節度使致仕宋史

三月四日端明殿學士左朝奉大夫新知湖州秦梓
乞致仕詔除資政殿學士依參知政事恩數致仕 十
八年八月八日左太中大夫范同以疾危乞致仕詔復
資政殿學士致仕初同任參知政事以罪罷未得職名
故有是命 十九年七月五日左朝奉郎提舉江州太
平興國公邊知白以疾乞守本官致仕詔復敷文閣待
制致仕以知白曾任權吏部侍郎因臣僚論罷未曾得

職故有是命 二十年四月十五日詔武功大夫和州

團練使兼閣門宣贊舍人幹辦皇城司劉伯濟守本官

依前兼閣門宣贊舍人致仕 二十一年八月五日太

傅鎮南武安寧國軍節度使充醴泉觀使咸安郡王韓

世忠乞致仕詔除太師致仕 二十五年十月二日詔

左朝散郎致仕朱郭儒與落致仕其陳乞遇恩澤免追

奪日後致仕更不推恩 二十一日詔太師尚書左僕

射同中書門下平章事兼樞密使秦檜可特授依前太

師進封建康郡王致仕少傅觀文殿大學士充萬壽觀

使兼侍讀秦熈可特授少師依前觀文殿大學士嘉國

公致仕乃令所司擇日備禮冊命熈檜之子也以檜疾

爲故有是命 十二月十九日詔責授果州團練使副

致仕胡寅可特授復徽猷閣直學士左承議郎致仕

二十五日詔敷文閣待制劉一止落致仕召赴行在一

止懇免續詔除敷文閣直學士依舊致仕 二十六年

十二月二日詔左朝奉郎喻樛右朝散郎陳按右朝請

郎邢輝並落致仕與内外差遣 二十七年三月二十

七日詔左金紫光祿大夫守尚書右僕射万俟卨特授

特進觀文殿大學士致仕時高以疾篤乞致仕故有是

命 四月七日少師保寧軍節度使信安郡王孟忠厚

乞致仕詔除太保依前保寧軍節度使信安郡王致仕

七月二十一日敷文閣學士左朝奉大夫成都潼川

府夔州利州路安撫制置使兼知成都軍府事蕭振以
病亟乞守本官職致仕詔與轉一官致仕賜銀絹五百
匹兩 九月二十一日詔顯謨閣直學士左通議大夫
康執權落致仕特授左太中大夫依前顯謨閣直學士
與郡 二十八日三省言直秘閣致仕鄭南政和初曾
任司業掛冠已久今九十三歲年德俱高搢紳推重乞
加甄獎以示貴老尚德之義詔除秘閣修撰依舊致仕
二十九年閏六月三日秘閣修撰張九成乞致仕與
復敷文閣待制致仕 三十年正月十四日左宣教郎
守尚書司封員外郎鮑彪自言年七十衰老不任職事
乞守本官職致仕從之 吏部郎官等楊朴等七人言

彪年雖及格而精力不衰不特乞掛宦冠清節可尚願
加旌異詔特轉一官仍賜章服 二月十八日左中奉
大夫試吏部尚書兼侍讀張燾乞致仕詔除資政殿學
士致仕未幾復命轉一官與支真俸朝廷方欲用燾而
燾以衰力病辭故有是寵 五月十八日入內內侍省
幹辦西京應天啓運宮寄資武顯大夫吉州刺史董壽
隆為病乞致仕詔特與歸吏部守本官也致仕 二十
五日詔沈誼落致仕復觀文殿大學士知明州 六月
十六日少傅潼川軍節度使充中太一宮宮使榮國公
錢忱言乞致仕詔除少師致仕仍特支真俸續有旨恩
數人從並依執致致仕條例 三十二年三月十六日

閣門言知閣門

趙述言

今月十六日紫宸殿接使人

書足弱久跪身創失儀詔趙述言年過七十累乞致仕

可從所乞

紹興三十二年六月十三日孝宗即位未

改元登極赦應文武致仕可從所乞官並賜粟帛羊酒

即曾任太中大夫觀察使以上官者倍賜應文臣承務

郎武臣承信郎以上并內臣及致仕官並興轉官合磨

勘者仍不隔磨勘 乾道元年正月一日大禮赦三年

十一月二日大禮赦六年十一月六日大禮赦九年十

一月九日大禮赦並同 同日赦應命官引年致仕之

人令監司郡守於所部搜訪節行才識精力未衰者具

名以聞當議量材任用其因疾病致仕如已痊安不以

年限滿與未滿許召官二員委保自陳特令再仕 十
月二十七日詔趙述係故韓王趙普五世孫可落致仕
與轉防禦使在京宮觀免奉朝請 十一月五日吏部
狀勘會今年六月十三日敕文臣承務郎以上并致仕
官並與轉官近據諸州軍申到文字其間有元係白身
因年八十以上該遇大禮或因顯仁皇后昨來慶壽有
子在官并無官特恩封叙承務郎以上致仕官乞依今
敕轉官緣似此之人敕內即不該載本部未敢具鈔詔
依敕施行

以上為一卷

宋會要

致仕下

孝宗隆興元年六月八日詔沈該改除觀文殿學士依舊致仕以右諫議大夫王大寶論列故有是命 七月五日資政殿大學士左太中大夫提舉萬壽觀張盡以疾甚告老詔與轉一官依舊資政殿大學士致仕已而盡又辭所轉官從之 十月二十四日詔文臣太中大夫武臣正任觀察使以上今後引年或持乞致仕於所出劄子內帶說合得恩澤資數如遇收使即繳連車中朝廷陳乞候批鑒已收使因依訖給還餘官並令繳連未後付身從吏部批鑒因依押印訖給還若州軍中發

文字在今降指揮月日之前許先次給降付身業後委知通取索末後付身批鑒已收使因依具狀保明中吏部從吏部尚書凌景夏之請也 二年四月二日臣僚言承議郎自來無中乞致仕之限以其無利害也身沒之後子孫匿喪以待時及合該磨勘日則寅緣保明轉員外郎下致仕故其子孫濫霑恩澤乞今後承議郎已下或遇身亡必令即時中所在州軍縣鎮照會如隱匿許人陳告重賞其保明官司及保官並真典憲從之 七月二十一日臣僚言臣聞皇祐中御史知雜司馬池嘗言乞應文武臣僚年及七十並令自乞致仕依舊與一子官若不自陳許御史臺糾察特令致仕更不奏子

其已陳乞有詔特留不在此限先是天聖中御史臺曹
修古亦謂臣僚年近八旬尚未辭官心力盡衰何職能
治自今除元老數賢詢議軍國自有典章外其内外官
年七十者乞下御史臺及諸路轉運司許自陳特與轉
官致仕不自陳者勘會歲數以聞特與致仕今見行之
法年至七十則不許磨勘轉官其次雖保亦不許為至
於子孫出仕者皆得陳為恩澤指射差違其限之以法
待之以恩可謂兩盡矣獨未嘗責令致仕如曹修古司
馬池所請也此無他一則貪望蔭補二則苟竊祠祿豈
有磨勘轉官不許乃許奏薦者耶豈有子孫尚得陳為
恩例自乃貪仕不得已者邪欲望取其成法裁以中道

其內外臣僚年七十不陳乞致仕者除合得致仕或遺
表恩澤外更不遇許却奏補所差宮觀於合得次數未
滿者更許陳乞一次從之 二十八日詔資政殿大學
士左通議大夫致仕賀允中可落致仕除提萬壽觀兼
侍讀 八月三日左奉議郎諸王宮大小學校教授詹
叔善言現年七十於條合該致仕詔詹叔善引年知止
足勵士風可依例致仕特與一子上州文學 五日
詔文武官七十致仕緣郊祀在近自降指揮後已未致
仕人合該奏薦子孫並聽更陳乞一次 十二日崇信
軍節度使開府儀同三司趙密乞守本官致仕詔特除
少保依前崇信軍節度使致仕 二十二日左中奉大

夫充集英殿修撰知宣州許尹乞致仕詔除敷文閣待
制致仕 二十三日顯謨閣直學士左通議大夫張闡
乞致仕詔除龍圖閣學士轉一官致仕 九月十日詔
少師保信軍節度使魏國公張浚依所乞守少師保信
軍節度使致仕 二十三日詔少保崇信軍節度使致
仕趙衮可落致仕權殿前司職事餘如故 十月七日
殿中侍御史晁公武言臣切見今年董德元復職致仕
臣僚論列德元當時致仕遺表承務郎六人委是僥倖
將來執政在謫籍者援例無杜絕已降指揮將德元復
職寢罷合得恩澤只依見存階官蔭補今未半年宋樸
汪勃事復果相繼陳乞致仕朝廷並與復龍圖閣學士

將來三人致仕遺表恩澤當補承務郎十八人兼七月
中臣僚言章已將內外臣僚年七十不陳乞致仕者不
許遇郊奏補續奉旨郊祀在近自降指揮後已未致仕
人合該奏薦者並更聽奏薦一次三^人上依上件指揮計
冒受恩澤二十一人其汎濫如此謹按宋樸汪勅章復
執政之時其無善狀與董德元一體同罪異罰何以慰
公論欲望旨將來宋樸汪勅章復復職指揮依董德
元例寢罷合得恩澤只依見存階官上蔭補今年遇郊
禮奏薦係未復職亦乞依條施行從之 十四日詔左
通議大夫知樞密院事兼參知政事賀正中依所乞除
資政殿大學士依舊致仕 閏十一月一日臣僚言趙

密除少保依前崇信軍節度使落致仕權殿前司職事
依楊存中除少保日合得恩數臣取會省部條格即無
三少初除恩數向來楊存中係時降指揮令趙密元因
致仕得除少保護者謂當納還三少始合禮法恕者則
謂其權掌禁兵若三衛曰歸密必依舊請老雖不納少
保可也今後省放行恐議請從之九日臣僚言信
州奏左中大夫余堯弼乞疾請老亦得此職是國閣學
士致仕臣伏見章復因致仕復龍圖閣學士言者論列
併與汪勃宋樸奪之幾數月爾今堯弼託疾請老亦得
此職是復失之於前而堯弼得之於後一予一奪有損
陛下總核之政所有錄黃未敢書行從之 乾道元年

正月十日吏部狀准批下故左朝請大夫木親男師魯等狀故父昨知龔州至紹興四年八月成資滿罷方起離間遣廣西革寇驅虜迫脅驚憂致疾陳乞致仕不及今乞依紹興七年閏十月十三日指揮放行蔭補本部勘當依昨降紹興七年閏十月十三日指揮朝議大夫至朝奉大夫因金人或盜賊驅虜被害身亡應陳乞致仕不及之人並依條蔭補今木師魯所陳無連到限內陳乞干照真本兼本部經大案牘不存無憑契勘已未陳乞收使了當欲令本家召見任職事官二員結罪委保并繳連限內陳乞干照候到開具申省詔特與放行合得恩澤 二月十七日利州觀察使主管侍衛馬軍

司公事張守忠乞守本官致仕詔特與轉威武軍承宣
使致仕 二十九日詔少保尚書左僕射同中書門下
平章事陳康伯可特授少師觀文殿大學士魯國公致
仕 三月二十二日左朝散郎章復隆興二年九月內
陳乞致仕續准尚書省劄子復龍圖閣學士致仕未授
告間臣僚論列復職指揮更不施行其致仕告敕至今
未授合與不合獲霑赦恩送吏刑部同共看詳申尚書
省逐部勘會依條中大夫至朝奉郎乞致仕不願轉官
者合得致仕蔭補恩澤一名若曾任侍從官以上罷任
不帶職及落職牽復人其致仕恩澤依敕從寄祿官蔭
補照得本官係曾任侍從以上落職未牽復人其寄祿

官見任朝散郎合得致仕蔭補恩澤一名乞朝廷詳酌
指揮詔章復許守本官致仕 二十五日鼎州觀察使
隴右郡王趙懷恩上遺表詔守本官致仕依條與致仕
遺表恩澤 五月二十四日詔敷文閣直學士左朝請
大夫致仕王大寶落致仕除禮部尚書 六月六日左
中大夫同知樞密院事王剛中以病篤乞致仕詔守本
官致仕 八月二十六日左朝議大夫黃中除集英殿
修撰守本官致仕 十月十三日朝奉郎致仕宋樸狀
昨於龍興二年八月內陳乞致仕准尚書省劄子復龍
圖閣學士致仕後因臣僚論列寢罷復職指揮其致仕
敕命合從朝廷出給施行詔宋樸許守本官致仕 二

年六月十二日中書門下省言臣僚集議白劄于內一項非泛補官如宗室戚里女夫及捧香異姓恩澤陣亡人女夫異姓上書獻頌文理可采隨奉使異姓補官及給使減年補官之類止當祿及其身若今更冒世賞愈見兄濫欲乞上項人如轉至合奏薦官候將來致仕日與一名恩澤已曾奏薦人更不奏薦從之 二十一日左朝奉巫伋乞守本官致仕詔巫伋復端明殿學士致仕次日侍御史王伯庠言伏覩聖旨巫伋復端明殿學士以巫伋嘗在樞庭降此恩命然巫伋初以秦檜擅權曲意奉事叨竊祿位無補國家陛下聖度如天猶以大臣之禮待之如使伋以祕殿隆名終於牖下則致仕遺

表恩澤當得數人方陛下續名實實之時而附下罔上
之人冒恩如此欲望特賜寢罷以為人臣黨附權目之
戒詔除龍圖閣直學士致仕二十五日王伯庠再章詔
守本官致仕八月二十日三少保寧武軍節度使新
興郡王致仕九月六日詔內侍闕洙特落致仕免參
部差幹辦內藏庫填見闕十一月六日楊存中太博寧昭
慶軍節度使楊存中乞守本官致仕詔十二月二十九
日左朝散郎集英殿修撰何備郡王致仕十二月二
十九日左朝散郎集英殿修撰何備乞守本官致仕詔
除教文閣待制致仕三年正月十二日詔武功大夫
和州防禦使鄧拱特落致仕與免叅部差幹辦內東門

司填見闕

六月十三日詔太傅奉國軍節度使四川

宣撫使吳璘除太師依前奉國軍節度使新安郡王致

仕

十月二十八日詔端明殿學士左中大夫提舉臨

安府洞霄宮楊椿除資^政殿學士致仕

十一月二日郊

祀赦應見任并致仕陞朝官服綠大夫以上服緋並事

至今日以前及二十年歷任無賊盜若私罪徒以上情

理稍輕者並許於所屬投狀磨勘改賜章服六年十一

月六日大禮赦九年十一月九日大禮赦並同

四年

正月六日中書門下省言白劉子契勣隆興二年七月

因臣僚言年及七十不肯致仕者不許遇赦郊祀奏補

當年八月指揮文武官年七十緣郊禮在近自降指揮

後已未致仕人合該奏薦並更聽陳乞一次今次郊禮其內外從官以上年及七十已未致仕亦已放行止有庶官即無指揮令相度欲將年及七十人曾經奏薦及該遇前郊放行一次之人並遵依隆興二年七月指揮更不許奏補其平生未曾奏薦文臣方始轉至大夫及帶職員郎及武臣武翼郎以上初應奏薦偶及七十歲之人欲乞放行一次奏補從之 二十九日詔左正奉大夫葉顥除觀殿學士致仕 三月十二日吏部侍郎周操言據故右中奉大夫直秘閣李弼儒男李迎狀陳乞故父致仕及非降黜中身亡恩例兩次本部契勘本官生前任右中奉大夫直徽猷閣因事落職後來止復

直秘閣致仕身亡即係未曾復至元職名除非降黜中
身亡恩例有礙條法外其所乞致仕蔭補外恩例依格
承務郎以上得減一年磨勘承直郎以下合作免試若
係責降不許陳乞昭得本官雖係落職未復盡職名之
人緣致仕恩澤已依近降指揮放行蔭補了當其致仕
恩澤陳乞不依本部切詳致仕蔭補及恩例俱因致仕
所得既致仕恩澤不作責降已許行蔭補即難以不與
致仕恩例今欲落職之人如合該蔭補恩澤即與放行
致仕恩例餘依見行條法施行從之 十二月九日故
武德大夫劉滌男植奏故父奉使北界身亡乞合得恩
澤吏部勘當依條諸段於王事者臨時取旨推恩即不

許陳乞致仕遺表恩澤詔劉滌特贈武功大夫忠州刺史依條與致仕恩澤外更與一名承信郎 二十四日詔武義大夫闕沫與罷幹辦內藏庫特官致仕 五年三月十九日詔右朝請大夫致仕錢億年可落致仕除權發遣利州路提點刑獄公事 八月十八日吏部尚書汪應辰言伏覩乾道元年三月指揮大中大夫以上其間有生前責降身後承指揮給還致仕遺表恩澤止得蔭補依條自無恩例吏部自合遵守成法又乾道四年三月吏部申請勘會依條中大夫至中散大夫蔭補外聽陳乞親戚一名恩澤今欲將落職之人如合該蔭補即與放行致仕恩例臣契勘得吏部兩次所請一則

太中大夫以上身後雖盡復職名却無恩例一則中大夫以下雖落職或復職不盡却得恩例輕重不倫前後相戾詔令吏部將中大夫以下放行致仕恩例指揮更不施行 十月十二日詔武義大夫權主管殿前司公事王達已守本官致仕為係權主管殿前司公事除依條合得恩澤外更特與恩澤一名 十一月二十四日左朝奉郎試右諫議大夫覃時乙致仕詔特轉一官依前試右諫議大夫致仕 六年正月二十四日詔黃中落致仕除權兵部尚書兼侍讀 閏五月三日殿中侍御史徐良能言伏見右朝議大夫傅寧臺叅為宮觀滿回謹按寧老職宿靈衆所部弃官年七十有五而實年

過之既滿宮觀便合休致然猶造朝營求差遣欲望聖
慈特令致仕詔依 八月二十六日吏部狀准付下故
右朝請郎富楠致仕恩澤蔭補男淑又准付下江州奏
故右朝請郎司馬備致仕恩澤蔭補男逸並於文資內
安排事勘會近降集議指揮內一項契勘非泛補官之
人轉至合奏薦官候將來致仕日與一名恩澤已曾奏
薦人吏不奏薦照得富楠初補因宣和五年六月御筆
富弼輔佐三朝年禩未久家世寒替其曾孫楠與補將
仕郎司馬備元名宗召改今名初補建炎三年七月二
十八日得旨係太師司馬光之姪見今在朝無人食祿
特與補官恩澤本部契勘逐官雖係特旨補官緣並是
所乞致仕恩澤本部契勘逐官雖係特旨補官緣並是

先朝元老之家所乞致仕恩澤伏乞朝廷詳酌指揮契
勘富補司馬備係富弼司馬光之後無補授非泛七
色之數有旨依條放行致仕恩澤十一月六日郊祀
赦內應見任及致仕文武陞朝官禁軍都虞候以上守
藩方馬步軍都指揮使父母妻並與封叙已封叙者更
與封叙亡歿者與封贈已封贈者更與封贈如祖父母
在願回授者聽應選人陳乞闕陞致仕通理任祿廟差
違如在乾道四年十一月九日以前罷任並出違條限
之人其考第並許收使并特奏名文學乞致仕之人曾
任祿廟如任滿在前項指揮之後與理為權官任數許
接理考任放行致仕九年十一月大禮赦同七年二

月二十七日詔太傅保康軍節度使大寧郡王吳益除
太師依前保康軍節度使大寧郡王致仕 六月十九
日詔左朝奉大夫汪勣左朝奉郎丞級並復龍圖閣學
士依舊致仕 七月四日詔左朝奉郎試太子詹事王
十朋除龍圖閣學士致仕 王十朋字龜齡温州樂清
人累官至侍講後告老以龍圖閣學士致仕命下而卒
年六十紹熙三年諡曰忠文宋史八月二十六日詔武
功大夫榮州刺史劉夔與落致仕特添差兩浙西路兵
馬鈐轄 二十七日詔御前忠佐馬步軍都軍頭高州
刺史趙勝特授右千牛衛將軍致仕 十月六日詔太
尉曹勛落致仕提舉皇城司特令趲赴六叅起居 十

一月二十九日侍衛步軍司奏武經大夫本司訓練官
劉昌奏為母李氏身故乞解官持服本軍關官管幹申
朝廷將劉昌特與起復依舊管幹軍馬外今據本將申
劉昌忽中風病勢危篤乞守本官致仕本將保明乞施
行詔候服闋日守本官致仕 十二月八日中書門下
省言在法陳乞致仕應蔭補者若歷任無入已賊及不
曾犯私罪徒但生曾前乞致仕雖亡歿出在勅前聽依
致仕蔭補法訪聞諸軍將應蔭補官以病乞致仕者其
家匿喪以俟致仕文字或經旬月殮殯失時深可憐憫
詔諸軍因疾病陳乞致仕之人仰本軍即時保明申所
屬縱亡歿在出勅前聽依上條蔭補 八年四月六日

詔右武大夫保康軍承宣使梁珂因多病乞致仕今已
痊安為係藩邸人數可落致仕與在京宮觀免奉朝請
五月二十六日右中奉大夫權尚書兵部侍郎程綬
乞致仕詔特轉一官依前權尚書兵部侍郎致仕 十
二月二十日詔左大武夫鄂州觀察使致仕陳子常落
致仕充入內侍省東頭供奉官幹辦御藥院 九年
正月十七日左朝散郎守起居郎劉季裴乞守本官致
仕詔除秘閣修撰致仕 閏正月二十七日詔復武康
軍承宣使王權特復清遠軍節度使致仕 七月七日
詔王之奇復資政殿學士致仕指揮更不施行以臣僚
論列故也 同日詔左奉議郎大理寺丞邵說特與轉

左朝奉郎致仕依條與致仕恩澤以差出措置通角在
路得疾也 九月十二日吏部狀嘉州奏承石宣教郎
孫茂狀為母親王氏年高乞致仕侍養本部照得本官
見年六十六母王氏見年九十六所乞致仕雖有建炎
元年指揮文武官非疾病危篤不能任職者不得陳乞
致仕今本官乞致仕侍養母親別無規避今欲依條格
放行轉官致仕從之 淳熙二年十二月十七日慶壽
教應文武已乞致仕年七十已上人並特與轉行一官
選人循一資無資可轉與改初等京官應命官引年致
仕其間有才識過人而體力精強者令監司郡守於所
部搜訪具名以聞當議量材任用 四年三月二十五

日詔迪功郎前添差遂寧府府學教授雍山特改宣教
郎賜緋致仕以山節操益堅行義彌著恬退不仕故有
是命 五年十二月二十六日詔迪功郎監漳州南嶽
廟龔明之與改宣教郎致仕仍賜緋明之平江人是年
以慶恩赦知府事華愛保奏明之鄉里推其年德宜被
褒寵故有是命 六年十月二十六日奉議郎金部員
外郎庶何年未六十自乞休致詔除直秘閣致仕何年
五十四未覺衰老而止足遽求休致上以其志可嘉故
有是命 八年六月一日詔潼川府司戶叅軍王昂特
改承務郎致仕昂以進士出身年踰六十始得一第不
願出仕從其請也 九年九月十三日明堂赦昨降指

禪因殺金平和尚原大儀鎮明州城下順昌府立功轉
官至教武郎乞致仕並理為戰功故行致仕恩澤尚慮
其間有因前項補授出身或轉資之人皆係親冒矢石
見陣立功可轉官人特與放行致仕恩澤 李燾傳淳
熙十一年春燾乞致仕優詔不允上數問其疾增損給
事中宇文价傳上旨燾曰臣子戀闕非老病忍乞骸骨
因叩价時事勉以忠蓋病革除數文閣學士致仕命下
喜曰事了矣口占遺表云臣年七十死不為天所恨報
國缺然願陛下經遠以藝祖為師用人以昭陵為則辭
氣舒徐卒年七十上聞嗟悼贈光祿大夫出宋史 十
三年正月一日慶壽教應文武已致仕年七十以上人

並特與轉行一官選人循一資無資可轉人與改初等
京官年八十人各更與加轉一官資應選人使臣年七
十以上願致仕者於合致仕官上與轉一官八十以上
轉兩官應文武致仕陞朝官年七十以上並與依格支
賜羊酒粟帛其年八十并曾任太中大夫觀察使以上
仍與倍賜

十四年九月九日迪功郎新成都府司戶叅軍史公
亮迪功郎新綿州司戶叅軍史天錫並不領出仕以其
官封贈父母詔史公亮史天錫並特依所乞各特循從
事郎致仕